


MAKWELA MPE

KUFWA MAKWELA

 Beto kulumusa bayintu ya beto ntangu yayi samu na mwa ntangu fioti ya bisambu. Tata ya kufuluka na Lemvo, beto me tonda Nge na suka yayi samu na ntangu ya mbote-mbote yayi ya kuvwanda awa na yinzo ya nene yayi, na kukutana na bwisi me kutsya ya kilumbu. Kasi beto zaba ve yina kilumbu ke na kubumba, kasi beto zaba Yina ke bumbaka kilumbu. Na yawu beto ke sambila ti Yandi Yina ke bumbaka kilumbu mpe mbasi, mpe Seko nyonso, ke sakumuna beto bubu yayi na yina beto me vukana kintwadi na Nkumbu ya Yandi, ti beto ke zaba mbote mutindu ya kuzinga samu na kusadila Yandi. Yayi kele dibanza ya beto nyonso, Tata. Nzambi, Nge zaba bantima ya beto, zaba ti yayi kele kieleka. Beto me kukipesa beto mosi na Nge, na ndambu ya kilumbu ke kwisa na ntwala, samu na kisalulu ya Nge, na Nkumbu ya Yesu Klisto. Amen.

² Beno vwanda. (Matondo na nge. Beno tala mosi yankaka awa.)

³ Mbote, na bantu yina ke talana na munu mpe dyaka na bantu yina ke talana na munu ve bisika nyonso na yinsi kisika ba ke na kulanda beto na nsinga na suka yayi. Yayi ke pesa munu ntangu ya nene ya mbote na kukwiza awa mpe kuzonzila na suka yayi na dilongi yayi ya mfunu mingi. Samu na bantu yina mu lenda talana na bawu, na kieleka ya ke sala mwa muvusu na mabanza, ya kele samu na ntwala ya munu ya kele na ba-rido, na yina mu fwana zonga na lweka ya bakala mpe na lweka ya kento. Mpe samu na bantu yina mu lenda talana na bawu ve, mu ke na kivinga na diboko ya bakala, mpe gymnase na diboko ya munu ya kento; mpe mu kele na zulu, na balele ya banela ya kufunguka na kati-kati, yina kele na diboko ya munu ya bakala mpe diboko ya munu ya kento. Mpe beto me kuzwa bantu ya kulutila, na suka yayi, na yinzo yayi ya nene, mpe na gymnase, mpe dyaka na yinzo-Nzambi, kuna na yinzo-Nzambi na bala-bala ya Nana mpe Bala-bala Penn. Mpe na bisika ya kulutila, nsinga ya alo-alo ke na kunata yawu na bisika yankaka.

⁴ Beto me kuzwa ntangu ya nene kati na Mfumu, mpe beto ke na yisi ya bakuvingila ya nene samu na lukutakanu yayi na suka yayi. Mpe ntangu yayi nkokila yayi ke vwanda ntangu ya kukanga campagne ya bilumbu yiya yayi, mbote, kieleka beto ke bokila bawu nyonso, yina lenda, na kuvwanda awa. Beto ke na kivuvu ti Mfumu ke pesa beto ntangu mosi ya nene na nkokila yayi na kusalaka diambu ya kulutila nene, na mutindu ti Yandi

ke belusa bambevo nyonso mpe ke sala bima ya nene yina Yandi ke salaka ntangu nyonso. Mpe beto kele na yisi ya kuvingila ya nene na nkokila yayi. Ba me bokila na ntima nyonso bantu nyonso, muntu nyonso, dibuundu ya dénomination nyonso. Beno lenda to ve kuvwanda Muklisto; kieleka beto ke na kubokila misumuki na kwiza kota, na kuvwanda na kati ya beto. Mpe beto ke sala nyonso na kulongisa bawu yinki kele nzila ya Mfumu, samu ti beto zingila.

⁵ Ntangu yayi mu banza ti bantu ke vwanda na kidi-kidi ve. Mpe mu ke na kusalaka kivuvu na Nzambi ti mu ke vwanda na kidi-kidi ve, samu ti mu me kuzwa mpimpa mosi ya mpasi mingi, na kuzaba ve yinki kusala. Samu ti mu me bakula ti bima yina mu ke tuba na suka yayi ke tulama na munu na Kilumbu ya Lusambusu, mpe mu—mu lenda kulala ve, mpe mu zaba ti kana mu kutuba yawu ve ya ke tulama na munu na Kilumbu ya Lusambusu. Na yawu ya ke kumisa yawu mpasi, beno lenda ve kutendula yawu.

⁶ Mpe ntangu yayi suka yayi kele ya dilongi ya nene yayi yina beto ke zonzila na *Makwela Mpe Kufwa Makwela*. Mpe ya kele samu na yina mu me sala yawu na lukolo ya Lumingu, ya kele samu ti beto zonzila na yawu mpe kubaka ntangu ya beto, na kisika ya kulonga dilongi na zulu ya yawu. Ya kele malongi ya Masonuku.

⁷ Mpe mu—mu zola kutuba ti, kana longi mosi to balongi, na kisika nyonso, ti bande yayi kubwa na maboko ya bawu, kana beto basisa bande yayi. . . Mu zaba ve yina dibuundu ke sala na yawu. Mu ke lomba na Mpangi Fred na kumona kimvuka ya dibuundu ntete yandi basisa bande yayi. Mpe samu na beno bisika nyonso na yinsi, yina kele na masini ke na kubakaka na bande, lemvo beno basisa bande ve kana ti beno kuwa na Mpangi Sothmann na yina me tala yawu.

⁸ Ntangu yayi, mpe kana ba me bika yawu kubasika, mpe bampangi nyonso ya munu ya balongi, to Muklisto nyonso bisika nyonso, yina ke ndima ve na zulu ya bima yina mu ke tuba samu na dilongi yayi, mu—mu ke na kivuvu ti beno ke tubila Yawu yimbi ve. Kana beno ke bakula Yawu ve mutindu yina mu ke longa Yawu, mbote, beno ke na muswa na yawu, mutindu longi, mutindu mvungi. Mpe mu ke zitisa nyonso yina beno ke kwikila.

⁹ Mpe ya kele na balukolo zole ya nene na zulu ya yayi. Mpe kana ya kele na bakuvuvu zole, ya kele na mosi ya yawu fwana vwanda ya kieleka, to ata mosi ve ya yawu kele kieleka. Na yawu beto ke meka na kutala na Ndinga ya Nzambi, na suka yayi, samu na kusukisa yayi. Na munu, kana ya kele kyuvu ya Biblia, kieleka Biblia kele na mvutu ya yawu.

¹⁰ Mpe ntangu yayi kaka ntete beto kuzwa bayayi, kubanda dilongi yayi, na kisika, ntete mu sambila na zulu ya Ndinga, mu zola zabisa na mosi na mosi ya beno, ti mu. . . mingi-mingi beno

Baklisto, ti mu zola . . . Mu—mu zola ti beno kusambila samu na munu na suka yayi. Mpe bantu nyonso na ngaanda yina mu lenda mona ve yina ke na kuwa na suka yayi, beno sambila samu na munu, samu ti mu zola kuvwanda ya kusungama mpe ya kieleka.

¹¹ Ntangu yayi beto ke bakula, na kusalaka mazabusu yayi, muntu mosi, kana ya kele kaka muntu mosi, yandi ke kangaka na Yawu mutindu Yawu vwandaka kati-kati ya luzingu mpe lufwa. Ya kele na mingi ya beno awa yina ke kwenda na kukwikilaka. Samu ti, mingi ya beno, mu banza, ke kwikila ve. Kasi mu zaba, na ministère ya munu, ya ke na bantu yina ke kwizaka na kuwa munu, mpe ke kuwa na yina mu me kuzwa na kutuba; katuka, mbote, ba kele ya kuvwanda kaka awa na suka yayi, ya bayinsi nyonso, katuka bisika mingi ya États-Unis, ya Canada, mpe na bayinsi ya nzenza. Mpe beno lenda banza yina ya ke tula na kuzaba ve yinki kusala, samu na kuzaba ti kisika ya Kukondwa nsuka ya muntu yina kele ya kuvwanda na maboko ya beno, samu ti yandi ke kangama na yina beno ke tuba. Na yawu Nzambi ke sala ti munu kupesa mvutu samu na yawu, mpe mu zola kukota na yayi kaka mutindu kieleka mu lenda.

¹² Ntangu yayi mu—mu ke lombamba na bampangi ya beto ya bakento. Mpe mu me bongisa mwa bampova ya munu samu mu lenda na kuzonzila yawu na ntwala ya bawu. Billy ke na kati ya posi ya yandi, na suka yayi, kuna, mwa bima yina ba lenda tuba ve na ntwala ya bantu me kuvukana. Mpe ndambu na kutala yina mu lenda tuba, yina beno fwana bakula. Beno kuzwa yawu mutindu ya me katuka—katuka na mpangi ya beno ya bakala, ya kulutila mbote yina mu zaba. Kana beno kele ya kuvwanda na bilo ya dokotolo mpe beno ke kuwa yandi, yandi zolaka tuba bampova yina kele mingi pwelele samu na beno. Mpe bayankaka ya beno bantwenya ya bamama mpe bantwenya ya babakala, mu zola ve ti beno kuzwa dibanza ya yimbi. Mu zola ti beno kukwikila, mpe kuvwanda kaka swi. Beno bambuka moyo, Kieleka fwana kutubama Kieleka.

¹³ Mpe, ntangu yayi, kukondwa ntembe kasi ya ke vwanda na mingi ya beno yina ke vwanda ya kundima ve na yina ke tubama, kasi mu zola kulakisa beno yawu na nzila ya Biblia. Mpe kuna mu banza, kana beno ke vwanda kaka na buzitu mpe kuwa, na manima beno ke kuzwa lubakusu ya mbote mpe dibanza ya yina mu ke tubaka ata kulemba ve, katuka ntama. Mu banza ti yayi ke bangula yawu, mpe mu ke na kivuvu ti ya ke vwanda.

¹⁴ Ntangu yayi mu banza ti beto ke vwanda mwa yinda, ngunga mosi na ndambu, to mu banza kulutila, na zulu ya yayi. Mu zaba ve wapi ntangu ya ke baka.

¹⁵ Mpe dyaka ntangu yayi, mu ke zola kutuba ti, na ntangu yayi, ti, na kuzabaka ti bantu ke kangama na bampova ya beno; ba ke salaka yawu, na ya pasteur ya bawu. Mpe, kieleka, mu vwandaka pasteur.

¹⁶ Mpe ba ke kangama na bampova ya pasteur, kaka mutindu ti ya vwandaka na kati-kati ya lufwa mpe luzingu. Ba ke kangama na bampova ya nganga-Nzambi ya bawu, kaka mutindu ti ya vwandaka lufwa mpe luzingu. Mpe kieleka, pasteur, mu banza na nyonso yina yandi zaba mutindu ya kusala, yandi ke na kulongisa bantu ya yandi kieleka kaka mutindu yandi kulongukaka na seminere; kukondwa ntembe kasi mutindu samu na nganga-Nzambi, mpe, na bansambulu ya mutindu na mutindu kisika ya kele na banganga-Nzambi. Kieleka, pasteur kele kieleka nganga-Nzambi; yandi ke kubondilaka samu na bantu. Na yawu, kana nganga-Nzambi, na nyonso yina yandi kulongukaka na ya yandi, na seminere mpe na ba-monastère, muntu na kusungama ya kieleka ke na kutuba kaka kieleka yina yandi longukaka.

¹⁷ Mbote, na yina, mu kele na ata nzingulu ya seminere to kimbangi ya monastère, mpe mu kele na ata kima mosi ve na nyonso yina, kasi mu ke na luzingu mosi kieleka ya mutindu yankaka.

¹⁸ Ba bokilaka munu ntangu mu vwandaka ntete mwa mwana ya bakala. Mpe kidimbu yina vwandaka monana na meso, vwandaka wakana kupesamaka na munu, Dikunzi ya Tiya ya kulelama na divunda, na mvula ya sambwadi, kaka awa na Utica Pike. Tata ya munu vwandaka sala samu na Tata O. H. Wathen yina me kufwa kaka ntama mingi ve. Mpe beno me tangaka buku, beno zaba disolo. Mpe katuka ntangu yina... Kuna na nzadi kuna Yawu kutalanaka na meso na ntwala ya bantu. Mpe ntangu yayi Yawu kele ya kubaka na foto, bambala mingi, mpe ya kele ya kulelama na Washington, DC, mutindu muswa nyonso me bumbama, kuna na Kivinga ya ba-Arts Religieux, mutindu Moyo kaka ya kimpeve yina me bakama na foto na kimbangi ya luzabu ya yinza; Dikunzi mosi ya Tiya, yina basisaka Israël na Égypte, kaka na mutindu mosi mpe na mutindu mosi ya kusala. Mu ke kwikila ti Yawu kele Yesu Klisto na mutindu ya Kimpeve, na kati ya kusalu ya Mwana ya Nzambi.

¹⁹ Samu ti ba vwanda bokilaka Yandi “Mwana ya muntu” ntangu Yandi kwizaka ntete, ntangu yayi ba ke na kubokila Yandi “Mwana ya Nzambi,” na Millénium Yandi ke vwanda “Mwana ya David.” Yandi kwizaka Mwana ya muntu, Profete, mutindu ba zonzilaka ntete samu na Yandi; ntangu yayi Yandi kele Mwana ya Nzambi, na kimpeve; na Millénium ya nene yina ke na kwiza, Yandi ke vwanda Mwana ya David, ya kuvwanda na kiti ya kimfumu ya David. Mutindu bantu nyonso yina ke tangaka Biblia zaba ti ya kele nsilulu ya Kinzambi na Nzambi, samu na David, Yandi ke telemisa Mwana ya yandi samu na kuvwanda na kiti ya yandi ya kimfumu.

²⁰ Mpe ntangu yayi samu na ministère ya mutindu ya munu mosi, ya mutindu yankaka, ba me pesa munu nkumbu nyonso

katuka “Nzambi” tii “dyabulu.” Mpe yina, ya ke vwandaka kaka ntangu nyonso mutindu yina.

²¹ Ya kele yina archevêque yayi ya dibuundu ya Katolika tubaka na munu nkokila yankaka yina kuna, kusolula vwandaka, ti yandi tubaka, “Mpangi Branham, Jean Baptiste kukitalisaka yandi mosi na kati ya Masonuku, mutindu kuzonzaka profete Ésaïe.” Yandi tubaka, “Ministère ya nge me zabakana pwelele na kati ya Dibuundu.” Yandi tubaka, “Ba-Lutherien kele na kati ya Biblia.” Yandi tubaka, “Bantu ya Luther zabaka Luther. Bantu ya Wesley zaba Wesley. Kasi wapi mutindu samu na bantu ya Pantekote?” Yandi tubaka, “Ba ke na kuyenga-yenga. Ba zaba ve kisika ya kukwenda.”

Mpe mu tubaka, “Tata, mu me tonda yawu.”

²² Mpe ya vwandaka ntangu yina Mpeve kubwaka na zulu ya mama yina, yandi me monaka ntete munu ve, kento ya yandi . . . mpe zonzaka mpe lakisa bima mosi.

²³ Ntangu yayi, samu na kuvwanda ya kusungama, ntete mu zonga Nsangu yayi na suka yayi, mu zaba ve. Mu tubaka na yandi, mu tubaka, “Tata, mu lenda ve kutuba yawu. Ya kele kima ya nene mingi na kutuba. Ya ke talana mutindu yina.”

²⁴ Kima mosi yina mu zaba, ti ya kele na kima me salama, ya kieleka. Bima nyonso yayi, kaka, na mutindu ya luzabu ya yinza me lakisa yawu, mpe me talisa bisika na bisika na yinza, ya lenda vwanda kaka ve kingana. Ya kele Kieleka. Yinki ya kele? Beno bika mu tuba, na kufunguna, ntete mu zonga na beno na suka yayi, mu zaba ve. Mpe mu ke lenda ve kubela na kima ni kima tii kana mu kuwa katuka na Yandi yina zonzaka na munu na ntangu ya ntama mpe tubaka na munu bima yayi.

²⁵ Beno bambuka moyo, Mfumu ya beto Yesu Klisto kulakisaka ata mbala mosi ve Yandi mosi mutindu Mwana ya Nzambi. Yandi tubaka, “Beno me tuba Mu vwandaka; ya kele samu na yina Mu butukaka,” mpe nyonso yina, kasi ata fioti mosi ve ti Yandi kukitalisaka Yandi mosi.

²⁶ Mpe, ntangu yayi, ya vwandaka Dikunzi ya Tiya yina twadisaka bana ya Israël, ya vwandaka Mfumu Yesu Klisto na nzutu ya Kimpeve, (beno me kwikila yawu?), Logos yina basikaka na Nzambi.

²⁷ Mpe na yina ntangu Yandi vwandaka na zulu ya ntoto, Yandi tubaka, “Mu me katuka na Nzambi, mpe Mu ke na kukwenda na Nzambi.” Beto nyonso zaba yawu.

²⁸ Mpe na manima ya lufwa ya Yandi, ya kiziku, mpe mvumbukulu: Saul ya Tarse vwandaka na nzila ya yandi na Damas, samu na kutalisa Baklisto mpasi, samu ti bawu vwandaka longa bima ya kuswaswana na yina ba longilaka bawu. Mpe yandi vwandaka munwani ya nene; na yisi ya Gamaliel, mosi ya milongi ya nene ya kilumbu yina, na lukolo ya

bawu, na monastère ya bawu; mpe muntu ya nene, mpe kisiyelo ya dibuundu. Mpe ya vwandaka kuna ti Nsemo ya nene, Dikunzi ya Tiya dyaka, losaka yandi na yisi, na kati-kati ya kilumbu. Mpe Ndinga tubaka, “Saul, Saul, samu na yinki nge ke na kutalisa Munu mpasi?”

²⁹ Ntangu yayi kana beno tala ntangu Paul, Saul, kutelamaka, yandi tubaka, “Mfumu, Nani Nge kele?” Ntangu yayi, mwana ya bakala yina, na kuvwandaka Juif, kieleka yandi zolaka bokila kima ve, kana ti ya vwandaka kima na kufwanikisa Nzambi, yandi zolaka bokila yawu ve “Mfumu.” Na yawu, Yawu vwandaka Dikunzi mosi ya Tiya.

³⁰ Mutindu Yesu kutubaka, “Mu ke na kukwenda na Nzambi. Mu katukaka na Nzambi, mpe Mu ke vutuka na Nzambi.”

³¹ Kuna Yandi vwandaka, ya kuvutuka na kati ya nzutu ya Dikunzi ya Tiya dyaka; Yandi tubaka, “Mu kele Yesu Yina nge ke na kutalisaka mpasi; mpe ya kele mpasi samu na nge na kutelemina bansende.”

³² Mpe beto ke bakula ti ntangu Ntumwa Pierre, na yandi yina ba pesaka bafungula samu na kutunga Dibundu, beto ke tala ti yandi vwandaka na boloko, mpe Dikunzi mosi yayi ya Tiya kulutaka bisengo, fungulaka bamwelo ya boloko, mpe basisaka Pierre, na kinsweki, kukondwa kwandi kuningisa mukengi. Samu na munu, Yawu kele Yesu Klisto mutindu mosi mazono, bubu yayi, mpe kukondwa nsuka.

³³ Mpe na yina beno ke zaba ntangu nyonso kima na nzila ya mutindu ya yawu. Kima nyonso ke zabana na nzila ya nkadulu ya yawu, na mbuma yina ya ke pesa. Mpe mu ke lomba na beno na kutala mbote mutindu ya mbuma Yawu ke na kupesa, Nsemo yayi yina kele Nzambi, samu ti Yawu ke vutukaka ntangu nyonso na Ndinga ya Nzambi, mpe ke lakisa Ndinga ya Nzambi, ke longa Ndinga ya Nzambi, mpe Nzambi ke lakisa ti Ndinga yango kele kieleka na ntuala ya beno. Ya fwana vwanda na kima na manima ya Yawu.

³⁴ Bantu me bokila munu profete. Mu ke bokilaka munu mosi ve profete, samu ti mu ke lenda ve na kutuba yawu, kasi mu ke . . . Mu ke tuba, mu lenda tuba yayi, ti Mfumu me pesa munu muswa ya kumona bima na ntuala, kutuba bima yina me salamaka, yina ke salama, yina ke na kusalama, mpe ata mbala mosi ve ti ya me kondwaka, na bambala makumi ya mafunda. Nyonso yina Yandi tubaka ke salama, kusalamaka. Beto nyonso zaba yawu. Kana ya kele na muntu na kati ya bantu yina mu lenda tala na suka yayi, to kisika nyonso, yina lenda tuba ti mbala mosi ya kondwaka, nge kele na kimpwanza ya kutelama mpe kutuba. Kasi kana muntu nyonso zaba ti ntangu nyonso, na bambala mafunda, ya salamaka kaka kieleka, beno tuba, “amen.” [Dibuundu me tuba, “Amen!”—Mu.] Beno me mona? Ya ke vwanda kima mutindu mosi bisika nyonso na yinza.

35 Kima ke na kubelama na kusalama. Nzambi me fidisa ve bima yayi kukondwa ya vwanda na lukanu na manima ya yawu.

36 Mu vwanda banza kaka awa. Mu tulaka yawu awa, na mosi ya banoti ya munu. Ti mu me lwata na suka yayi, paire mosi ya babuto ya ba-manchette. . . Mpe beno mingi me kuwaka na star yayi ya cinema, Jane Russell, mpe mama ya yandi kele muntu ya Pantekote; mpe Danny Henry kele kisoni ya yandi, kisoni ya yandi ntete, mwana ya mpangi ya kento ya mama ya yandi. Yandi wandaka Baptiste. Yandi wandaka ya kuvwanda na lukutakanu, ya Bantu ya Mumbungu na Los Angeles, na Californie, bamvula zole me luta.

37 Mpe mu vwanda me manisa kaka na kuzonzila na bakutuba ya nene, ya ngolo, ya ngolo mingi, ti mpe mukengi, mosi ya mikengi ya nene ya ba-Assemblée de Dieu, me kulumuka na kukwiza na estrade me katuka balcon kisika yandi wandaka ya kuvwanda, mpe yandi me tuba, “Mu banza ve ti Mpangi Branham me zola kutuba yawu.”

38 Mu tubaka, “Mu fwana zola kutuba yawu, tata. Yawu kele MUTINDU ME TUBA MFUMU.” Mpe, kuna, ya wandaka na zulu ya dibuundu na nsungi yayi.

39 Mpe na ntangu yina, ntwenya yayi ya bakala yina wandaka muntu ya mumbungu. . . Mpangi ya yandi ya bakala kele na lweka. . . yandi wandaka kuna wandaka baka bafoto samu na televizyo na suka yango, mpangi ya yandi yankaka kele—kele mfumu ya bisalu ya banzila ya Californie. Mpe Danny Henry me belama na manima lukutakanu me manisa, na estrade, mutindu *yayi*, kisika bantu nyonso wandaka ya kuvwanda, me belama na kubumba munu. Mpe yandi tubaka bampova yayi, “Mpangi Branham, mu banza ve ti yayi ke wakana kuvwenza, kasi,” yandi tubaka, “ba lendaka sala yawu Apocalypse kapu ya 23.” Na yina, ya kele kaka na makapu makumi zole na zole na kati ya Apocalypse. Yandi tubaka, “Mu banza ti yayi ke wakana kuvwenza ve.” Yandi tubaka kaka yina ti. . . Ntangu yayi, mwana ya bakala yango wandaka Baptsite, mpe zabaka kima mosi na yina me tala kimpeve. Na maboko ya yandi ya kuzunga munu, yandi me banda na kuzonza na ndinga ya malu-malu.

40 Mpe na yina yandi me manisa na kuzonza na ndinga ya malu-malu, ya wandaka na kento mosi ya nene, ya ndombi ya kuvwanda kaka na ntwala ya munu, yandi me telama, me tuba, “Ya ke na nsatu ya ntendulu ve.” Yandi me tuba, “Mu kele ya Shreveport, na Louisiane, to, na Baton Rouge, na Louisiane.” Yandi me tuba, “Ya kele pwelele Falansa.”

41 Victor Le Doux, yina wandaka muntu ya Lumputu, wandaka mpe ya kuvwanda kuna, yandi tubaka, “Kieleka, mu kele muntu ya Lumputu, mpe ya wandaka kieleka Falansa.”

42 Mu tubaka, “Vingila fyoti. *Nge* sonika yina yandi me tuba, mpe *nge* sonika yina yandi me tuba, ntete beno tuba kima. Beno sonika yina beno tuba, mpe beno lakisa banoti ya beno.” Mpe na yawu mosi sonikaka, mpe yankaka sonikaka, mpe punctuation vwandaka mutindu mosi.

43 Mpe dyaka pene kaka ya ntangu yina, ntangu ba nataka banoti ya bawu, ntwenya mosi ya bakala ya mpusu ya mwamba ngazi, ya kitoko me belama katuka manima. Kisika, ya vwandaka ve na kisika samu na yandi na kuvwanda; yandi vwandaka ya kutelama na manima. Yandi me kwiza na ntwala, me tuba, “Minuti kaka, mu zola kutula noti ya munu, mpe.” Yandi me tuba, “Mu kele mutendudi ya Etats-Unis na Falansa, na Etats-Unis.” Yandi me tuba, “Mu zola kubika noti ya munu.”

44 Mpe, awa, banoti nyonso tatu mutindu kaka mosi, na Falansa. Mpe beno tala yinki ya ke tuba. Yayi kele banoti ya ntete yina ba bakaka, noti yina ba bakaka kaka na ntangu yina. Yayi kele noti ya Danny, yandi mosi, yandi tulaka yawu na posi ya yandi. Kieleka, ba samunaka yawu na Bantu ya Mumbungu ya Baklisto, mpe nyonso yankaka yina.

Samu ti nge me sola nzila ya fyoti, nzila ya mpasi, nge me tambula na yawu na nsodolo ya nge mosi, Nge me baka lukanu ya kulunga mpe ya kusungama, mpe ya kele NZILA YA MUNU.

Samu na lukanu ya ngudi yayi, kitini ya nene ya Mazulu ke vingila nge. Wapi lukanu ya nkembo nge me sala!

Kima yayi, na yawu mosi, ke pesa, mpe ke sala ti kusalama, lunungu na Luzolo ya Kinzambi.

45 Awa, muntu yayi me sonika nkumbu ya yandi awa, “Kutuba ya zulu yayi vwandaka me tendulama na . . . ya Danny Henry yina pesaka profes na zulu ya Mpangi Branham, yina bantu tatu kupesaka kimbangi na cafétéria na Los Angeles, na Californie.”

46 Ntangu yayi, ntwenya mosi yayi ya bakala yina pesaka profes yayi, vwandaka zaba ve yina yandi vwandaka tuba, vwandaka na Jérusalem pene ya ngonda mosi me luta. Yandi kuzwaka ntangu ya mbote-mbote ya kukwenda kuna mpe—mpe kulala na ndyamu kisika Yesu kufwaka mpe kisika ya kiziku ya yandi. Mpe na yawu na yina yandi vwandaka ya kulala kuna, yandi tubaka ti mu kwizaka na dibanza ya yandi na ngolo mingi mpe yandi bandaka na kudila. Yandi tubaka, “Mutindu ti ya me vwanda mpasi mingi samu na Mpangi Branham na kutelemina yinza mpe bima yayi, mpe mabuundu nyonso!”

47 Mutindu ba—ba tubaka mbala mosi samu na muntu mosi, na lweka ya Billy Graham, ba vwanda tuba, “Beto lenda mona Billy Graham, samu ti mabuundu nyonso kele ya kuvukana kintwadi samu na yandi. Beto ke mona Oral Roberts, bantu ya Pantekote.

Kasi wapi mutindu ya kundima kima, ntangu Yawu kele ya kuswaswana na yina bantu kulongukaka?” Ya kele Nzambi.

⁴⁸ Mpe, Danny, yina yandi salaka samu na kulutisa ntangu, yandi vwandaka pasula mwa matadi. Yandi kwendaka kisika ba tulaka Kulunsi, kisika ba ke tubaka ti Kulunsi kuvwandaka na kati ya ditadi. Muntu ve vwandaka pene-pene, na yawu yandi pasulaka mwa bitini ya ditadi mpe yandi tula yawu na posi ya yandi samu na kubambukila yawu moyo, me vutuka mpe me sadila munu paire ya bifiniku ya yintu ya yawu. Mpe, kima ya ngitukulu, ntangu yandi salaka yawu, ya vwanda talana mutindu ya vwandaka na batasyi ya menga. Mpe kaka na kati-kati ya mosi na mosi ya bawu, na kulandilaka, vwandaka na nzila ya kusungama, ya fyoti kaka na kati-kati ya bawu. Ntangu yayi ya lendaka vwanda kaka . . . Beno me mona, muntu yankaka lendaka tala yawu ve, kasi samu na munu ya ke pesa lukumu ya bima yina mu ke kwikilaka. Mu ke kwikila ti kima nyonso ke na mbangululu na yawu.

⁴⁹ Mpe ntangu yayi, na ntangu yayi, nyonso yina Mfumu me . . . Kana yayi kele ve kima yina Yandi silaka na, na Malachie 4 mpe dyaka na Luc 17, mpe Masonuku mingi yankaka yina ke salama na kilumbu yayi ya nsuka, bika ti mu tuba yayi samu na kumanisa, ya ke sala lufulu samu na muntu ntangu yandi ke kwiza. Na yawu mu me tonda mingi ti Nzambi ya Ngolo nyonso, kana ya vwanda mutindu yina, me pesa munu muswa ya kusala mwa kima, na malongi ya munu ya fyoti, samu na kulakisa luzolo ya munu na zola ya Yandi na munu, zola ya munu na Yandi, mpe zola ya beto na bantu.

⁵⁰ Na yawu, na makieleka, mu ke kota na dilongi yayi ya *Makwela Mpe Kufwa Makwela*. Ti Nzambi vwanda na kyadi na beto nyonso.

⁵¹ Mpe ntangu yayi beno zibula makutu ya beno mbote. Mpe, bampangi ya bakento, beno telama ve mpe beno basika ve; beno vwanda kaka swi mwa ntangu fyoti. Bampangi ya babakala, beno sala mpe mutindu mosi. Beno kufwa ba-radio ya beno ve kuna, beno bayina kele na nsinga ya alo-alo yayi. Beno sala yawu ve. Beno vwanda kaka swi baminuti fyoti, tii ya ke manisa. Beno zibula makutu ya beno. Kana beno me ndima ve, beno tula na yisi Masonuku yina mu me baka, mpe na manima longuka Yawu na kati ya kutatamana na bisambu ntete beno baka lukanu ya beno.

Nzambi, sadisa beto na yina beto ke meka na kukota na dilongi yayi.

⁵² Ntangu yayi, ya lendaka vwandaka mwa yinda. Mu zola ve ti beno vwanda ya kukanga ntima. Mpe beno baka ntangu ya beno, beto nyonso, mpe kulonguka Ndinga ya Nzambi, na kieleka mpe na kukota na yawu, na yina beto zaba mutindu ya kulonguka Yawu.

53 Beto banda na Santu Matthieu, kapu 19. Mpe kubanda, mu banza, na nzila ya 8 ya kapu 19, mu zola kubanda. Mu lendaka banda mpe na nzila ya 1, mpe kutanga tii na nzila ya 8 ya kikapu 19.

54 Ntangu yayi, beno bambuka moyo, bima yayi yina mu ke tuba fwana katuka na Ndinga ya Nzambi. Ya lenda ve kuvwanda dibanza ya munu mosi, samu ti dibanza ya munu kele kaka mutindu ya muntu nyonso yankaka. Kasi ya fwana vwanda tii na kimakulu na Ndinga ya Nzambi. Beno bambuka moyo, Nzambi ke bikaka kima nyonso tii na kimakulu. Yandi ke sobaka ve. Yandi kele mutindu mosi mazono, bubu yayi, mpe kukonda nsuka. Beno ke kwikila yawu? Yandi kele mutindu mosi.

55 Ntangu yayi mu ke tanga katuka kapu 19.

Mpe ntangu, Yesu manisaka bandinga ya kieleka yayi, yandi katukaka Galilée, mpe kwendaka na kizunga ya Judée na ntwala ya Jourdain;

Mpe bantu mingi vwandaka landa yandi; mpe yandi belusaka bawu . . .

Ba-Pharisien mpe kwizaka na yandi, samu na kumeka yandi, . . .

56 Mu ke telama ntete kuna samu na kubika beno kubakula mbote banani yina zolaka kumeka Yandi.

. . . tubaka na yandi, Ya kele ya kulunga samu na bakala na kukatula kento ya yandi na makwela na konso dyambu?

Mpe yandi vutulaka mpe tubaka na bawu, Beno me tangaka ve, ti yandi yina vangaka bawu na mbandukulu vangaka bawu bakala mpe kento,

Mpe tubaka, Samu na dyambu yayi bakala ke bika . . . tata mpe mama, mpe ke kwenda zinga na kento ya yandi: mpe bawu zole ke kuma nzutu mosi?

Na yawu ba kele dyaka ve bawu zole, kasi nzutu mosi. Na yina yina Nzambi me vukisa kintwadi, ti muntu ve kukabula.

Ba tubaka na yandi, Na yina samu na yinki Moïse kupesaka lutumu ya kupesa mukanda ya kufwa makwela, mpe . . . katula kento na makwela?

Mpe Yandi tubaka na bawu, Moïse samu na bantima ya beno ya ngolo pesaka beno muswa ya kukatula bakento ya beno na makwela: kasi na mbandukulu ya vwandaka ve mutindu yina.

Ntangu yayi, Nzambi, kusadisa beto.

57 Masonuku yayi, kyuvu yayi, vwandaka na ntwala ya Yesu na mbandukulu kaka ya ministère ya Yandi. Mpe ya vwandaka na ntwala ya Moïse na mbandukulu kaka ya ministère ya

yandi. Ya kele kyuvu ya ngundi ya ntete na bantima ya mikwikidi. Musumuki ke kipeke ve. Kasi ya kele mikwikidi, samu mukwikidi ke na kumeka na kusala nyonso yina yandi zaba mutindu ya kusala samu na kuzinga mbote na ntwala ya Nzambi. Na yawu yina, kyuvu nyonso yina ke talaka lukwikilu, na yina dyambu ya *Makwela Mpe Kufwa Makwela* kele mpe. Samu na yinki? Samu ti ya kele dyambu ya disumu ya ntete. Ya kele kisika disumu kubandaka. Mpe ya kele samu na yina ya ke basikaka ntangu nyonso, samu ti ya kele kaka kubanda ya disumu.

⁵⁸ Ntangu yayi mu ke kuzwa ve ntangu ya kubangula bima nyonso yayi, kasi mu ke na kyese na kupesa mvutu na mukanda ya beno to kima nyonso mu lenda. To, beto ke na babuku ya kusonama na zulu ya yawu, mpe bakyuvu mingi, mpe kwandi bitini ya bazulunale mpe bima awa, samu na kulakisa yayi, beto zaba ti ya vwandaka Ève (Pomme yina yandi zolaka kudya, kisika ya kele kwandi ve na Masonuku, ntangu yayi ba ke tuba ti ya vwandaka abricot; ya vwandaka ata mosi ve.), yandi sala kinsuza, yina pesaka mwana ya ntete, yina vwandaka Caïn, mwana ya Satana, samu ti na kati ya yandi vwandaka na dyabulu. Ya lutaka ve na Abel. Caïn vwandaka mwana ya Satana.

⁵⁹ Mu zaba kyuvu ya beno ntangu yayi, “Ève tubaka, ‘Mu me kuzwa muntu na ngolo ya Mfumu.’” Yina kele kieleka ya kusungama.

⁶⁰ Beno lendaka baka kento ya ntima ya yimbi na mbanza, bakala ya yimbi; kana ba kuzwa bébé, ya ke vwanda na ngolo ya Mfumu, samu ti Nzambi kusalaka misiku. Mpe misiku yayi, mutindu kubasika ya mwini; kana beno tula matiti ya mpamba-mpamba na bilanga ya mbote, ya ke mena. Mpe ya fwana mena, samu ti ya kele musiku ya Nzambi. Ntangu ba me kuna nkuna, ya fwana mena. Mpe kima ve lenda menisa luzingu kasi Nzambi, samu ti ya ke salaka na yisi ya misiku ya Yandi. Na yawu ntangu ba kunaka nkuna ya dyabulu na kivumu ya—ya Ève, ya zolaka basika, samu ti ya kele musiku ya kubasika ya Nzambi. Mpe ya zolaka sala kima yankaka ve kasi kunata yawu, mpe ya zolaka katuka na Nzambi.

⁶¹ Ya kele nsasa yina bantu ke tubaka, “bana ya ba-bébé,” ntangu yankaka “yina me butuka ve na bibuti ya Baklisto, kele ya kuzimbana.”

⁶² Menga ya Yesu Klisto ke katulaka disumu ya mwana yina, mu ke kipe ve lutangu yandi kubutamaka mpe mutindu yimbi yandi me butama. Yandi kele Mwana-dimeme ya Nzambi yina ke katula disumu ya yinza. Mwana ya fyoti lenda ve kufunguna masumu, samu ti yandi kele ve na kima ya kufunguna, mpe yina vwandaka disumu ya yinza yina ba katulaka na nzila ya Menga ya Klisto. Ba-bébé ke kwendaka na Mazulu.

63 Ya kele disumu ya ntete, mpe ya kele samu na yina ba ke—ba ke pesaka kyuvu na yawu. Ntangu nyonso yina kima ya kuyituka ke katuka na Nzambi, na yina me tala kima ya ntete: “Yinki me tala makwela mpe kufwa makwela?” Ntangu yayi, mutindu ntangu nyonso, ya kele dyaka kyuvu na kati-kati ya bantu. Mutindu ya vwandaka na bilumbu ya Yesu, mutindu ya vwandaka na bilumbu ya Moïse, ya ke vwandaka ntangu nyonso, mpe ya kele dyaka kilumbu yayi, kyuvu na kati-kati ya bantu, samu ti bantu zola kuzaba yinki kele Kieleka.

64 Kasi kisika ya kele na kyuvu, ya fwana vwanda mpe na mvutu. Mpe ntangu yayi na kuvwandaka na mvutu, mutindu mu vwandaka me tuba ntete, lumingu yayi, ya fwana vwanda na mvutu ya kulunga. Mpe kana beto kuzwa mvutu ya kima mosi, mpe ti ya—ya kele ve ya kusungama, kuna beto zaba ti ya vwandaka luvunu. Kasi ya kele, beno ke landila na kuyufula tii kyuvu ya tsyelika ke kuzwa mvutu, kana beno zola kuzaba Kieleka. Mpe yayi na kuvwandaka kyuvu ya Biblia, ya fwana vwanda na mvutu na Biblia.

65 Ya kele mutindu mu vwandaka me tuba, kana mu vwandaka zola kukwenda na suka yayi na esete, mpe kulutila mbote mu zaba yayi, mu fwana tala na kima mosi na bilanga, mpe ya kele mbala mosi na esete, mpe mu ke kwenda na esete. Muntu ke tuba, “Mpangi Branham, *yayi* kele esete.” Ya kele, na kutala esete, kasi ya kele node esete. Mu ke luta kaka kima yina mu vwandaka tala; mu ke vutuka, na kuzabaka ti ya vwandaka luvunu. Mpe kuna kana muntu mosi kutuba, “Mpangi Branham, kwenda mutindu *yayi*, na diboko ya nge ya kibakala.” Ntangu yayi, ya kele na pwelele esete, mpe, kasi ya kele sude esete. Mu ke zimbana kima yina mu vwandaka tala, samu ti mu me kwenda na zulu ya bandilu ya kulunga mpe ya nzila ya kusungama.

66 Ntangu yayi, kana ya kele mutindu yina, beto kele na balukolo zole ya dibanza na zulu ya *Makwela Mpe Kufwa Makwela*. Mpe ya kele, mosi ya yawu ke tuba, ti, “Bakala lenda kaka kukwelana mbala mosi, kana ti kento ya yandi kufwa.” Mpe yina kele mosi ya bakyuvu, kasi, kana beno kwenda na kulandaka yina, beno ke luta bandilu. Mpe kuna yankaka yina ke tuba, “Oh, kana kento to bakala, mosi to yankaka, kusala pité, to mosi ya bawu lenda katuka na makwela mpe kwelana dyaka.” Beno ke tala beno mosi na zulu ya ndilu na yina.

67 Na yawu, beno me mona, ya kele to ve sude esete to node esete; beto zola mbala mosi esete. Beno ke basika na Masonuku ntangu beno ke kwenda mutindu *yayi*, beno ke basika na Masonuku ntangu beno ke kwenda mutindu *yina*. Beto zola kisika Masonuku ke vukana na Masonuku, mpe kuzaba yinki kele Kieleka ya yawu. Mosi na mosi ke baka nzila ya kuswaswana, mpe ke kondwa na kunata mvutu ya kulunga, kasi ya fwana vwanda kaka na mvutu.

68 Ya kele mutindu, bubu yayi, ya kele na balukolo zole ya nene ya malongi na dibuundu; mosi ya bawu kele Calvinisme, yankaka yina kele Armin-...Arminien. Mosi ya bawu kele muntu ya misiku, yankaka yina kele ya lemvo. Mpe beto me tala ti bantu yina ke kwikilaka na lemvo, ba-Calviniste, ba ke tubaka, “Nzambi kusakumuna, ya ke sala munu mpasi ve na kunwa tabaka. Ya ke sala munu mpasi ve na kunwa malafu. Mu lenda sala bima yayi, mu ke na lukengolo ya Kukonda nsuka.” Kuna beto ke mona lweka yankaka yina, ya muntu ya misiku, kutuba, “Oh, mu zola kunganina yandi, mu ke zola kulakisa yandi nani mu kele, kasi, mu kele Muklisto, mu fwana vwanda swi.” Beno me mona, beno ke mona beno mosi na banzila zole ya kuswaswana, mpe ata mosi ya bawu kele ya kulunga. Ntangu yayi, ya kele mpasi na kutuba yawu, kasi ya kele kieleka.

69 Beto ke mona beto mosi na banzila zole ya kuswaswana; mosi, ke baka nzila mosi; mosi, ya yankaka. Ntangu yayi bika beto mona yinki Kieleka kele.

70 Ntangu yayi beno kuwa, mpe beno mona kana yayi ke wakana mbote na beno. Mutindu, kana mu me kubama na kukwenda na bayinsi ya nzenza, mpe mu ke baka dibuta ya munu, mu ke bokila kento ya munu, mpe mu ke tuba, “Beto ke kwen-...mu ke kwenda na bayinsi ya nzenza, cherie.” Ntangu yayi yayi kele lweka ya bantu ya misiku, “Ntangu yayi, kento ya munu, mu ke pesa nge musiku! Kana nge basika na bakala mosi na ntangu mu me kwenda, ntangu mu ke vutuka nge ke vwanda kento ya kufwa makwela. Mpe mu zola ve ti nge sala meso na muntu, mu zola ve ti nge basika na muntu! Nge me kuwa yawu? Mu kele bakala ya nge! Kana nge sala yawu, mu ke katula nge na makwela ntangu mu ke vutuka.”

71 Kuna yandi ke simba mpe ke baka munu na cravate, mpe ke tuba, “Bakala ya munu ya mbote, mu zola kuzonza na nge kima, nge me mona, nge me mona, ti kana nge lula na kento mosi, to nge basika na kento mosi, to kubasika na kento mosi, nge ke vwanda bakala ya kufwa makwela ntangu nge ke vutuka.” Ntangu yayi, yina ke vwanda yinzo ya kyese? Yina kele bantu ya misiku. Mbote mingi.

72 Ntangu yayi, lweka yankaka yina kele, ti kana mu kwenda na bayinsi ya nzenza mpe ti mu sala foti. . . Mu ke kwenda mpe ke tuba, “Ntangu yayi, tala, mu ke basika na kento *yayi*. Oh, ya kele nyonso ya kulunga na kento ya munu, yandi ke kipe ve.” Kento ya munu ke tuba, “Mu ke basika na bakala *yayi*. Ya kele nyonso ya kulunga na Bill, yandi ke kipe ve.” Kana mu kipe ve, kuna ya kele na kima yina ke na kutambula mbote ve na munu; mu zola kento yina mbote ve. Mpe kana yandi kipe ve, ya kele na kima yina ke na kutambula mbote ve na yandi. Yandi kele kento ya munu; mu zola ve bakala yankaka kusakana na yandi. Yandi kele kento ya *munu*.

⁷³ Ntangu yayi, mutindu ya kulunga ya yawu, kele, ya kele ti bawu nyonso zole ke na tsyelika, kasi Kieleka ya kulunga ve.

⁷⁴ Ntangu yayi ntangu mu ke kwendaka na bayinsi ya nzenza, samu na kusungika yawu, mwa dibuta ya munu ke vukana, mpe beto ke sambila na mosi na yankaka. Mpe mu ke pesa bawu na Nzambi, mpe bawu ke pesa munu na Nzambi. Mpe ntangu beto ke sala yawu, beto ke kwenda bayinsi na lweka yankaka ya mubu. . . mu ke kwenda bayinsi ya nzenza. Ntangu yayi, mu zaba ti yandi zola munu; mu na kivuvu na yandi. Yan- . . . mpe mu zola yandi; yandi kele na kivuvu na munu. Ntangu nyonso yina mu zola yandi mutindu yina, yandi ke vwanda na ata boma ve na munu na kubasika na kento mosi yankaka. Ntangu nyonso yina yandi ke zola munu mbote, oh, mu ke na nsatu ya kubanza ve ti bakala yankaka ke na kubasikaka na yandi, samu ti yandi kele kento ya munu mpe mu ke kwikila na yandi.

⁷⁵ Mu ke kwikila, kieleka kana mu sala kima mosi ya yimbi, mu sala foti mpe ti mu basika na kento mosi, mpe ti mu vutuka mpe mu ke funguna yawu na yandi, mpe kutuba na yandi, “Méda, mu zolaka ve kusala yawu. Ba simbaka munu na mutambu; kento yango kwizaka na munu na nswala nyonso mpe—mpe bakaka munu diboko, mpe bandaka *yayi-mpe-yayi*,” mu banza ti yandi ke bakula. Mu banza ti yandi ke lemvokila munu samu na yawu. Kasi mu lenda sala yawu ve, samu na ata kima, samu ti mu zola yandi. Ata ti yandi ke lemvokila munu, mu ke sala yawu ve. Mu zola ve kunyongisa yandi, samu na ata kima mosi. Ata ti mu zaba ti yandi ke lemvokila munu samu na yawu, mu zola ve kunyongisa yandi.

⁷⁶ Mpe ya kele mutindu ya kele na Nzambi. Kana mu . . . kana zola ya *phileo*, yina kele zola ya kimuntu, zola ya bumpangi, lenda sala bakala kutala mutindu yina na kento ya yandi; wapi mutindu samu na zola ya *agapao*, mpova zola kutuba na ki-Grec “zola ya Nzambi,” wapi mutindu ya ke sala munu kusala na Yesu Klisto? Munu, ntangu nyonso yina mu zola kukwenda sala yawu, ya kele na kati ya ntima ya munu na kusala yawu! Ti . . . Mu ke tuba, ntangu nyonso yina ya kele na kati ya ntima ya munu na kusala yawu, mu ke kwenda sala yawu. Ya misiku ke bika munu ve kusala yawu, ya kele samu ti mu zaba ti ba ke pesa munu kitumbu na kusalaka yawu. Kasi Kieleka ya makieleka ya yawu kele, ya kele ntangu zola ya Nzambi ke kwiza na kati ya ntima ya beno tii beno ke *zola* kusala Yawu. Yina kele Kieleka ya yawu. Beno tala balukolo nyonso zole. Ya misiku ve to yankaka, to Calvinisme, ya kele nyonso zole.

⁷⁷ Ntangu yayi beto ke mona bubu yayi, mpe, ya kele na ba-dénomination mingi ya mutindu na mutindu. Ya kele na dibuundu ya Katolika, dibuundu ya ba-Protestant. Mosi na mosi ya bawu ke tuba ti bawu kele Nzila, beno me mona, “Beto kele Nzila, beto kele Kieleka.” Ya kele na ba-Méthodiste, ke tuba, “Beto ke na Kieleka.” Ba-Baptiste ke tuba, “Beto ke na Kieleka.”

78 Mbote, na munu, ntangu nyonso yina ba ke tala mutindu yina, ya kele kieleka ve, samu ti Yesu tubaka, “Mu kele Kieleka.” Beno me mona?

79 Na yawu, mutindu dilongi ya munu ya mazono na nkokila vwandaka, ti Yandi kele kisika kisika Nzambi me tula Nkumbu ya Yandi, kisika kaka ya kusambila. Beno kele ve Muklisto samu ti beno kele Protestant. Beno kele ve Muklisto samu ti beno kele Katolika. Beno kele ve Muklisto samu ti beno kele Méthodiste, Baptiste, to muntu ya Pantekote. Beno kele Muklisto samu ti beno me botama na kati ya Yesu Klisto, na nzila ya Mpeve-Santu, ve na nzila ya maza. “Ya kele na Lukwikilu mosi; Mfumu mosi; mbotika mosi,” ya kele mbotika ya Mpeve-Santu. Mbotika ya maza ke kotisa beno na kati ya kimpangi. Mbotika ya Mpeve-Santu ke kotisa beno na kati ya Klisto. Beno tala Kieleka.

80 Beto ke dyaka na mabanza nyonso zole na zulu ya yayi *Makwela Mpe Kufwa Makwela*. Ntangu yayi, ti, Mfumu ya beto me fungula dinsweki ya Bidimbu Sambwadi ya Ndinga ya Yandi na beto, na bilumbu yayi ya nsuka. Ntangu yayi, mingi ya beno, yayi lendaka vwanda ki-Grec samu na beno, kasi dibuundu ya munu ke na kubakula. Yinki? Mpe beno kuwaka na ba-vision mpe yina kusalamaka. Mpe kyuvu kele kyuvu ya Biblia, ba me bokila beto awa na kukwikila ti ya fwana vwanda na mvutu ya kieleka na dinsweki nyonso ya kubumbama yina vwandaka ya kubumbama kubanda mbandukulu ya yinza. Mpe Biblia ke pesa baprofesi mpe ke tuba ti na kilumbu yayi mansweki yayi ke zabana. Apocalypse 10, “Mpe na makelele ya wanzio ya sambwadi, ti nsangu ya Laodicée, mansweki ya Nzambi ke zabana.” Mpe yayi kele nsungi ya nsuka, ya kele Laodicée.

81 Beno tala reveil nyonso yayi yina me landila bamvula kumi na tanu to ya kulutila, mpe ata dénominatation mosi ve me basika na yawu. Luther kuzwaka reveil, kuna me salama dénominatation; Wesley, kuna me salama dénominatation; Alexander Campbell, kuna me salama dénominatation; nyonso yankaka ya nene yayi . . . John Smith mpe nyonso yankaka, ba-dénominatation, Moody, nzila nyonso. Kasi awa me vwanda na mosi. . . Na bambala nyonso reveil ke salaka kaka pene ya bamvula tatu. Kasi yayi ke na kwenda bamvula kumi na tanu, mpe ata dénominatation mosi ve me basika na yawu, samu ti yayi kele ntangu ya Nkuna. Ya kele dyaka ve na mpusu; na manima mpusu me katuka, ya kele Nkuna.

82 Nzambi kele ya kukubama, kana Yandi ke na kusalaka yawu ve ntangu yayi, Yandi ke bokila Dibundu na kulunga na nzila ya Ndinga ya Yandi, Yesu Klisto. Beno tala, ya fwana vwanda na mvutu kisika mosi, mpe na kuvwandaka yina dinsweki ya Bidimbu Sambwadi ya Nzambi, Bidimbu Sambwadi . . .

83 Bantu yikwa ke bakula yawu, beno telemisa diboko ya beno. Bika beto mona. Mu banza ti mingi ya bawu kele dibuundu

ya beto ya kizunga awa, beno kuwa. Kana ve, babuku ke na kubasika na bilumbu fyoti, na zulu ya dyambu yayi. Beto ke na babuku, mwa babuku na zulu ya Yawu ntangu yayi.

⁸⁴ Yesu, na dilongi ya beto, ke na kubokila beto na kuvutuka na mbandukulu, samu na mvutu ya kieleka ya Masonuku.

⁸⁵ Ntangu yayi, ntangu yayi vwandaka na ntwala ya Yandi, ya vwandaka na bima zole ya kutala. Banganga-Nzambi tubaka na Yandi, “Bakala lenda katula kento ya yandi na makwela, kukwela yankaka, samu na dyambu mosi?”

Mpe Yesu tubaka, “Ya vwandaka ve mutindu yina na mbandukulu.”

Na manima ba tubaka, “Moïse pesaka beto muswa na kusonika mukanda ya kufwa makwela, mpe na kukatula yandi na makwela samu na dyambu nyonso.”

⁸⁶ Yandi tubaka, “Yina, Moïse kusalaka yawu samu,” mu ke telama fyoti samu na kusonika nzila, “samu na bantima ya beno ya ngolo; kasi katuka, to na mbandukulu ya vwandaka ve mutindu yina.” K̄yuvu!

⁸⁷ K̄yuvu bubu yayi, mutindu ngemba ya yinza, “Ya ke kwiza na nzila ya bapolitiki, kuvukana ya bayinsi, ya kuvukana kintwadi?” Mu ke tuba na beno, ve. Ya ke kondwaka konso ntangu, mpe ya ke vwanda dyaka. Kasi ya kele na mvutu ya kieleka na kyuvu, “Ya ke vwanda na ngemba na zulu ya ntoto?” Yinga, ntangu ba ke katula disumu na ntoto, kuna ngemba ke vwanda. Kasi tii kilumbu yina, ya ke vwanda ve na ngemba; “yinsi ke telemina yinsi, kimfumu ke telemina kimfumu.” Nzambi pesaka nkisi samu na disumu. Beno kuwa mbote ntangu yayi. Nzambi pesaka nkisi samu na kukatula disumu na ntoto, kasi muntu na ntoto zola ve kundima nkisi ya Nzambi.

⁸⁸ Nzambi pesaka beto nkisi mpe mutindu ya kukwela bakento ya beto mpe kuzinga na bawu, kasi bakala zola ve kundima nkisi ya Nzambi, zola ve kundima Ndinga ya Yandi na zulu ya yawu. Yesu tubaka yayi. Mpe yayi ke bambula beto Bandinga ya Yandi, na kuzabaka ti Yandi tubaka, “Mazulu mpe ntoto ke kondwa, ke luta, kasi ya Munu ve.”

⁸⁹ K̄yuvu, mvutu ya kieleka yina Yesu zolaka beto kuvutuka, kele kuvutuka na mbandukulu. Kuna, ya ke vwanda na Genèse, samu ti mpova *Genèse* kele kapu ya nkuna ya konso kyuvu na Biblia. Mpe ntangu nyonso beno fwana vutuka na nkuna na kumona wapi mutindu ya nkuna kele na kati ya bilanga, samu na kutala yinki ke vwanda mbuma ya beno. Ntangu yayi, wapi mutindu ya nkuna ba kunaka? Genèse, na kuvwandaka kapu ya nkuna, beto ke vutuka na Genèse. Yesu ke kotisa beto na Masonuku yina, “na mbandukulu.” Ntangu yayi, beno bambuka moyo, ya kele ntangu ntangu kubandaka. Na ntwala ya yina, ya

vwandaka na Seko. Ntangu yayi, kyuvu ya beto kuna vwandaka, beno tala, kana beto vutuka na mbandukulu.

⁹⁰ Ntangu yayi beno kondwa yayi ve! Mpe ya kele samu na yina mu zola kuzonza na malembe, samu ti bantu yina kele kuna na bansinga ya alo-alo, mpe ti bande ke tuba yawu pwelele.

⁹¹ Kana Yesu tubaka, “Beni vutuka na mbandukulu,” ya vwandaka kaka na konso kima bima zole na ntoto. Ya vwandaka na Adam mosi, Ève mosi, kaka na nzila ya Nzambi ti ba kuvukanaka. Mpunda mosi ya kento, bakala mosi; tyaku mosi ya kento, mosi ya bakala. “Na mbandukulu,” mutindu Yandi me tuba na beto na kuvutuka na manima, ya vwandaka kaka na konso kima bima zole. Ya kele kieleka? Dyaka, beto ke mona ti nyonso “na mbandukulu” vwandaka tambula na mutindu ya kulunga mpe na kintwadi na Nzambi, kima ve vwandaka na ngaanda ya nzila.

⁹² Nyonso na mazulu kele dyaka ya kusungama; bambwetete nyonso, ba-salulu ya bambwetete nyonso ya ngonda mpe mwini, nsalulu ya mwini, nyonso kele kieleka ya kusungama. Kana mosi ya bawu kukatuka, ya ke zenga ndandani nyonso.

⁹³ Ntangu yayi beno kuwa. Beni ke na kumona? Kuzenga mosi ke bebisa ndandani nyonso! Ntangu yayi, ntangu bantu ya moyo vwandaka landila na kutambula na Nzambi, na bakala mosi mpe kento mosi, kento yayi sumukaka mpe ya losaka dikani nyonso ya ntoto na ngaanda ya kulandila na Nzambi. Na yawu, mpova mosi ya kubwela na Buku yayi, to kukatula Ndinga mosi na Yawu, ke losa Muklisto na ngaanda ya kulandila na Nzambi, ke losa dibuundu na ngaanda ya kulandila na Nzambi, ke losa dibuta na ngaanda ya kulandila na Nzambi. Mukwikidi nyonso lenda losama na ngaanda, na kundimaka ve konso Ndinga ya Nzambi.

⁹⁴ Na yina, ya vwandaka kento yina nataka kukabuka na yinzo yayi ya luzolo. Ya vwandaka ve Chérubin salaka muvusu na ntoto. Ya vwandaka ve Adam tsyamunaka yinzo. Ya vwandaka ve kima yankaka tsyamunaka yinzo, mpe tsyamunaka kima ya muvimba na kulandila, kasi kento, Ève. Mpe ya kele awa ti, ya zenganaka “na mbandukulu,” ti Yesu vwandaka zonzila. Yesu tubaka, “Na mbandukulu, Nzambi salaka bakala mosi, kento mosi, ya mutindu nyonso.” Mpe ntangu yayi ntangu kento yayi. . . kento ya mpunda ve, kento ya yibwa ve; kasi kento, yandi zengaka kulandila ya muvimba ya kisalu ya Nzambi na zulu ya ntoto, mpe losaka nyonso na kati ya lufwa. Kento, bakala ve, kento zengaka ngwisani. Yandi zengaka ngwisani, samu ti (samu na yinki?) yandi lutaka bandilu ya Ndinga ya Nzambi. Ntangu yayi, kana yandi zengaka ngwisani ya yandi na bakala ya yandi, yandi zengaka ngwisani ya yandi na Nzambi; na yina, samu ti yandi zengaka ngwisani na Nzambi, yandi zengaka yawu na bakala ya yandi.

⁹⁵ Mpe ntangu beno ke zengaka nsilulu ya beno mpe ngwisani ya beno na Ndinga ya Nzambi, ya kele yina nataka bamambele mingi ya dibuundu ya ke landila misiku ve, samu ti nkonga ya bantu me vukana mpe me tuba, “Mbote, Yawu zola kutuba *yina* ve,” mpe ya losaka organisation nyonso na ngaanda ya kulandila na Nzambi. “Beto ke kwikila Yawu ve. Docteur Jones tubaka ti Yawu vwandaka mutindu yina ve.” Kasi ntangu nyonso yina Nzambi ke tuba ti Yawu kele mutindu yina, Yandi tubaka, “Ti dyambu nyonso ya muntu kuvwanda luvunu, mpe ya Munu kuvwanda Kieleka!” Kuna ya zengaka kulandila.

⁹⁶ Ntangu yayi beto na kumona, na yina ti kulandila kuzenganaka, kuna nzila ya Luzingu kuzenganaka, mpe nzila ya ntangu kuzenganaka, ngwisani kuzenganaka, nyonso kufwaka! Yinki nataka yawu? Kento. Ya kele yina zengaka ngwisani. Ntangu yayi, kana beno zola kutanga yawu, beno lenda tanga yawu, na Genèse 3.

⁹⁷ Ntangu yayi, ya vwandaka kuna ba tulaka bakala na kuyala na zulu ya kento, na nzila ya Ndinga ya Nzambi. Kento vwandaka dyaka ve mutindu mosi na bakala. Kento vwandaka mutindu mosi na nkadulu, beno zaba; kasi, ntangu yandi zengaka Ndinga ya Nzambi, Nzambi salaka bakala na kuvwanda mfumu na zulu ya yandi. Genèse 3:16, kana beno zola kusonika yawu. Yandi vwandaka dyaka ve mutindu mosi na bakala. Yandi kolamaka na Ndinga ya Nzambi.

⁹⁸ Beno ke na kumona, “kento,” yandi, dibuundu awa? Yandi kolamaka na Ndinga ya Nzambi, yina losaka yandi nyonso na ngaanda ya kulandila. Mpe ya kele yina dibuundu me sala, mpe me losa lufwa ya kimpeve na zulu ya kima nyonso. Ntangu yayi beno ke bakula samu na yinki mu ke tatamana na bima yayi mutindu mu ke salaka. Ya kele Kieleka! Yayi kele mambu ya Biblia.

⁹⁹ Beno tala, samu na yinki yandi salaka kima ya mutindu yayi? Wapi mutindu kento ya luzolo yina, ya kitoko, ya kulunga zolaka . . . ?

¹⁰⁰ Mu monaka kilumbu mosi kifikulu mosi, mu banza ti ya vwandaka na Grèce, ya artiste mosi yina fikulaka kifikulu mosi ya Ève. Yandi vwandaka kima ya kulutila yimbi yina beno me monaka ntete ve. Yina ke lakisa yina dibanza ya kimuntu lenda tala. Kasi, yandi vwandaka ve mutindu yina; yandi vwandaka kitoko mingi, samu ti yandi vwandaka kento ya kulunga, nyonso kento.

¹⁰¹ Beno tala, samu na yinki yandi salaka kima ya mutindu, yandi na kuvwandaka na kitezo ya zulu? Yandi vwandaka ya kulunga na bakala, mutindu mosi na yandi. Kasi beto nyonso zaba ntangu yayi ti yandi zimbisaka bumutindu mosi ya yandi na bakala, ntangu yandi kusumukaka, mpe Nzambi tubaka,

“Bakala ke vwanda mfumu ya nge katuka awa.” Ntangu yayi, ya kele Masonuku. Kana beno zola, beto lenda tanga yawu.

¹⁰² Mu ke na kupesaka beno Masonuku, samu na kulanda ntangu samu na bayina ke na kulandaka na singa ya alo-alo bisika nyonso ya yinsi, samu ti beno lendaka tanga yawu beno mosi.

¹⁰³ Beno tala samu na yinki yandi salaka yawu. Wapi mutindu Satana kumaka kwandi tii na yandi?

¹⁰⁴ Beno zaba ti Satana vwandaka mutindu mosi na Nzambi kilumbu mosi? Kieleka ya vwandaka, nyonso kasi kiyidiki ve; yandi vwandaka nyonso, yandi vwanda telamaka na diboko ya kibakala ya Nzambi, na Mazulu, Chérubin ya ntwadisi ya nene.

¹⁰⁵ Beno tala samu na yinki yandi salaka yayi, yandi vwandaka ve na ngidikulu ya ntete. Yandi kele ve na ngidikulu ya ntete ya Nzambi; yandi kele kima na nzila ya kima. Na yawu, “na mbandukulu,” mutindu Yesu vutukilaka na yawu, yandi vwandaka ve kivangu ya moyo ya ntete ya Nzambi. Yandi kele kima na nzila ya bakala, ntangu Yesu vutukilaka na “mbandukulu.”

¹⁰⁶ Beno bambuka moyo, Adam vwandaka nyonso zole bakala mpe kento, na ngidikulu ya ntete, mosi, kasi na manima ba kabulaka yandi na lumpanzi.

¹⁰⁷ Beno tala, kasi kima na nzila ya kim, mpe, beno tala, yina kaka na nyonso ya ngidikulu ya Nzambi, na niama nyonso mpe nyonso yankaka, kento vwandaka yina kaka ba salaka mutindu yayi. Bakento nyonso yankaka vwandaka na ngidikulu ya ntete. Konso kento yankaka vwandaka na ngidikulu ya ntete, kasi Ève vwandaka ve na ngidikulu ya ntete. Beno me mona, ya zolaka vwanda mutindu yina. Beto ke kuma na yawu na manima ya mwa ntangu fyoti. Beno tala, na ngidikulu yayi yina yandi vwandaka, na ya ntete ve, kasi kima na nzila ya kima. Mpe na ngidikulu yayi, ya kele . . .

¹⁰⁸ Ntangu yayi mu zola ve kunyongisa beno, kasi mu zola kutuba na beno Kieleka. Mpe beno kele kaka ya kuvwanda swi; beno ke na kusala mbote.

¹⁰⁹ Ya kele ve na kima yina ba salaka na kuvwanda ya kuvuna mingi, mutindu kento yina kele ya kuvuna mingi. Ya lenda vwanda ve na kima yankaka; ya kele na kima ve na kuvwanda mutindu yina.

¹¹⁰ Mpe, ya kele na kima ve yina ba lenda vuna na mpasi mingi ve mutindu kento. Ntangu yayi, kubwa ke lakisa ti nsangu yayi kele kieleka, kubwa na mbandukulu.

¹¹¹ Yandi vwandaka ve ngidikulu ya kubanda ya ntete. Yandi vwandaka na kati ya Adam, kasi na kibukento ya kento ve, yandi mosi, na mbandukulu. Yandi vwandaka kima ba salaka na nzila ya kima.

¹¹² Ntangu yayi, ya kele ve na kima yina ba salaka yina ba lenda vuna, mpe kuvunama, na mpasi ve mutindu kento. Ya kele na kima ve yina ba salaka to yina lenda kubwa na yisi mutindu kento lenda. Beno banza ntangu yayi. Ya kele na kima ve yina ba salaka, na ngidikulu nyonso, yina lenda kubwa na yisi mutindu kento lenda. Yandi lenda pasula ntima ya bakala na bitini-bitini na malembe kulutila kima nyonso yankaka yina kele na yinza, ya kele kento ya yandi. Ti mwa kento yango kwenda tambula bisika na bakala mosi yankaka; beno tala bakala yina kuvwanda kuna na bana ya yandi, masa ya meso kubasika na meso ya yandi. Yandi kele ya kusala mutindu yina. Yandi kele ya kusala mutindu yayi. Ya kele na ngulu ve, yimbwa ve, to kibulu yankaka ve, yina ba salaka mutindu yandi to yina lenda kubwa na yisi mutindu kento lenda kubwa. Ntangu yayi, ya kele kieleka.

Na kuzitisaka mingi bampangi ya munu ya bakento, mu zola kaka ti beno kutala mbote.

¹¹³ Ata niama ve lenda kondwa bumuntu. Beno ke bokilaka yimbwa “ya luzolo,” yimbwa ya kento, beno ke bokilaka ya bakala . . . ngulu “kento ya ngulu,” kasi bunkadulu ya yandi ya buzitu me luta funda ya ba-mille na ba-star mingi ya Hollywood. Ya kele mutindu yisi ba salaka yandi na kubwa. Yandi lenda ve. . . Beno banza kaka na yayi ntangu yayi. Ya kele na kima ve na yinza, yina Nzambi salaka na ngidikulu, yina lenda vwanda na nkadulu ya kukondwa buzitu, kubwa yisi mutindu yina.

¹¹⁴ Beno ke tuba, “Vingila fyoti, ‘bakala!’” Beto ke kuma na yawu. Kento fwana tuba, “yinga.”

¹¹⁵ Beno tala, ya kele na kima ve yina ba salaka na kubwa mingi na yisi, to na kuvwanda ya kutsyema ve, kasi kento. Yimbwa lenda ve kusala yawu, ngulu lenda ve kusala yawu, ndeke lenda ve kusala yawu. Ata niama ve me kondwa bumuntu, ya lenda vwanda ve, samu ti ba salaka yawu ve mutindu yina samu ti ya vwanda. Ngulu ya kento lenda vwanda ve na nkadulu ya kukondwa buzitu, yimbwa ya kento lenda vwanda ve na nkadulu ya kukondwa buzitu, ndeke ya kento lenda vwanda ve na nkadulu ya kukondwa buzitu. Kento kele kima kaka yina lenda sala yawu.

¹¹⁶ Ntangu yayi beno me mona kisika Satana kwendaka? Beno me mona? Kasi kento kele dyaka, yandi kele yina ke na ngolo ya kutuba “yinga” to “ve.” Beno me mona, ya me tala yandi kisika yandi zola kukangama yandi mosi. Beno me mona? Ntangu yayi awa beto lenda mona pwelele nkuna ya nyoka, kisika ya kotaka. Ya kele na kisika kaka mosi yandi zolaka kwenda. Kana yina lenda ve kukotisa yawu mbote, muntu mosi kele ya kufwa meso. Beno me mona? Beno me mona, ya fwana kwenda kuna.

¹¹⁷ Beno tala, nsasa samu bibulu yina lenda sala yawu ve, niama ya kento, ba vwandaka na ngidikulu ya ntete. Kasi kento vwandaka ve na ngidikulu yango ya ntete. Ntangu yayi beto ke

vutuka na manima na kutala yawu, na manima kunata beno mbala mosi na kati ya bilumbu yayi, na Ngwisani.

¹¹⁸ Ba me sala yandi, yandi mosi, na luzingu ya kutsyema ve mpe ya kuvedila ve. Yimbwa lenda ve, mpe lenda ve kento nyonso yankaka. Ya kele kaka kento yina yandi lenda. Yimbwa to bibulu nyonso yankaka, mbala mosi na mvula, mpe yina samu na bana; ve samu na nsatu ya kuvukisa banzutu, kasi samu na bana. Ngulu ya kento ya kukula, yimbwa ya luzolo ya kukula, mbala mosi na mvula, na ntangu mosi, ya kele samu na bana ya yandi. Kasi ba salaka kento samu na ntangu nyonso yina yandi ke zola. Mu ke na bima yankaka awa yina mu me fwa ntangu yayi; beno lenda banza na yina me bikana. Yimbwa lenda ve; kento lenda. Mu banza ti Mpeve-Santu ke monikisa beno yankaka ya yayi yina mu me katula awa.

¹¹⁹ Yandi kele mutindu ya kima kaka mosi, mutindu ya kento, yina ba salaka ya kulutila kitoko na bakala. Ya kele na mutindu yankaka ve na kati-kati ya kima nyonso. Bivangu nyonso yankaka ya Nzambi babakala kele kitoko, mutindu na bibulu, bandeke, mpe nyonso yankaka, ntangu nyonso bakala ke vwanda kitoko.

¹²⁰ Beno tala mbambi ya bakala ya nene, na bayinti ya mbote, mutindu ya nene; mpe mwa mbambi ya kento ya kuvwanda swi. Beno tala nsusu ya bakala ya nene na mapapu nyonso ya yandi ya kitoko; mpe mwa, nsusu ya kento ya ndombi. Beno tala bandeke, ndeke ya bakala mpe ndeke ya kento. Samu na yinki? Samu na yinki ya kele mutindu yina, na bivangu nyonso ya Nzambi? Na konso kivangu, bakala kele ya kulutila kitoko. Na kati-kati ya mameme, na kati-kati ya bangulu, na kati-kati ya bampunda, na kati-kati ya bima nyonso yankaka, ya kele ntangu nyonso bakala ya nene yina kele kitoko, mpe na bandeke.

¹²¹ Kasi na kati ya dikanda ya bantu, ya kele kento yina kele kitoko, bakala ve; kana yandi kele yawu, ya kele na kima ke na kutambula mbote ve, kuvukisa ya nkuna kele kisika mosi. Kubanda mbandukulu ya kele mutindu yina. Samu na yinki? Samu na yinki ya kusalamaka? Samu na kuvuna. Yina salaka yandi, Satana, ke na kusalaka dyaka na yandi, mpe, na bilumbu yayi ya nsuka.

¹²² Beno bika munu kutelama awa kaka samu na mwa ntangu fyoti. "Kitoko!" Beno zaba ti, kufwa ya ntete, ya bayinsi nyonso, ya yinza, to ya yinza ya muvimba, vwandaka samu na kitoko ya bakento? "Ntangu bana ya babakala ya Nzambi kumonaka bana ya bakento ya bantu kitoko, ba bakaka samu na bawu bakento." Ya kele kieleka?

¹²³ Beno me tala kutombuka ya kitoko ya bakento na kilumbu yayi? Mu monaka foto ya Pearl O'Brien, yina zolaka vwanda kento ya kulutila kitoko, na ntangu mosi. Ya kele ve na ntwenya

ya kento na lukolo yayi kasi yina zolaka lutila yandi, ntangu yawu ke kuma na kitoko.

¹²⁴ Kutombuka ya boté ya bakento ke na kulakisa ntangu ya kuvuna. Na wapi ntangu dibuundu me talana ya kulutila kitoko kuluta yina ya ke na kusala bubu yayi? Nyonso ke na kukuma nene, bayinzo ya mbote ya nene, mpe mafuku ya *yayi* mpe mafuku ya *yina*. Beno ke mona ve, “kento,” kuvuna!

¹²⁵ Ntangu yayi, ya kele ve na kima yina lenda kubwa mutindu yandi, mpe ba salaka yandi samu ti ba lenda na kuvuna yandi. Mpe Satana na kieleka ke na kusalaka na yandi bubu yayi, na bilumbu ya nsuka, samu ti yandi kele yina ke sala yandi. Mu lenda lakisa yawu ntangu yayi. Na kuvutuka na manima na mbandukulu, kisika yandi bandaka na kusala na zulu ya yandi, Adam to Satana, Nzambi to Satana? Beno me mona, yina kele yina ke sala yandi. Ya kele mbele ya yandi ya ngundi na kulosa bakala ya kutsyema ve ya yandi, na kuvwandaka kento ya kitoko, yandi lenda kotisa bakala na nzila nyonso yina yandi zola. Mpangi ya bakala, ya kele ve nganda kuna yina ke kuzwaka bakala na mutambu; ya kele kento ya kitoko yina ke tambula na bala-bala, na kuningisaka nzutu ya yandi mosi, ya kulwata ndambu. Ya kele yina ke bakaka. . . Ya kele kaka muntu ya kuvuna kuna. Mpe yandi ke sadila yawu na mutindu ya kufwa, na kieleka nyonso mutindu ya kufwa. Beno lenda yufula na Satana na kuvwandaka yina ke sala yandi, kasi ya kele Kieleka. Satana salaka yandi. Yandi ke na kusala dyaka yawu.

¹²⁶ Beno bika munu kulakisa beno kima na Masonuku. Mu fwana vutula beno na Masonuku, mpe beno ke fikula dibanza ya beno mutindu beno ke tala yawu bubu yayi.

¹²⁷ Satana kele yandi yina salaka mutindu yina ya boté. Kana beto ke tala, yandi vwandaka ya kulutila kitoko na Bawanzio nyonso na Mazulu. Ya kele kieleka? Mpe yandi zolaka sala Mazulu kisika ya kulutila kitoko na kimfumu ya Michel. Ya kele kieleka? Mpe, samu na kulakisa ti Cain vwandaka mwana ya yandi, yandi pesaka bisambu ya kulutila kitoko, bongisaka ba-autel ya yandi na bambuma mpe bafololo, mpe nyonso yina. Ya kele kieleka? Kitoko! Disumu kele kitoko, yina beto ke bokilaka kitoko bubu yayi. Mpe disumu ke vunaka, na nzila ya kitoko. Beno ke tala ve kento kutambula na bala-bala mpe kutuba yinki kele na kati ya ntima ya yandi. Beno me mona? Kasi mu vwandaka me zola kutuba bima yayi samu ti beno kumona samu na yinki ti Satana kele yina ke sala yandi. Ya kele kaka kieleka, mwana ya yandi mosi lakisaka yawu, Cain. Ntangu yayi, kento kele kitoko samu ti yandi kuvuna.

¹²⁸ Yinza kele kitoko samu ti yawu kuvuna. Mu zola kutuba *kosmos*, mutindu ya kusala ya yinza. Ya kele kitoko samu ti yawu kuvuna, bisika ya nene ya mbote mpe ya mbongo mingi.

129 Beno bambuka moyo na profete, Amos, ntangu yandi kumataka mpe talaka na yisi ya mbanza, mpe monaka yawu mutindu Hollywood ya bilumbu yayi, mwa meso ya yandi ya kiboba kukangamaka fyoti, na yisi ya bansuki ya mpembe yina vwandaka ya kubwa na kizizi ya yandi. Mpe yandi kulumukaka kuna na Nsangu, mpe wakisaka Yawu na kisika yina. Yandi tubaka, “Nzambi kaka yina beno ke tubaka ti beno ke sadilaka, ke kufwa beno!” Ya kele kieleka.

130 Disumu, ya kele kitoko. Ba ke kifwani ya Judas mutindu mwa munwi-malafu mosi ya kiboba yina vwanda vwanda na bala-bala kisika mosi, mpe yinwa mwasi na banzini na kati, mpe nyonso yina, mutindu Judas. Judas vwandaka kitoko, na ngolo, muntu ya kuvuna. Ya kele ve bakala yina kele pene-pene ti beno fwana tala mbote, ya kele ve (kikuni ya kiboba) yina ke kwizaka na salopette, yina beno fwana tala mbote pene-pene ya kento ya beno; ya kele muntu ya mbongo mingi yina, yandi kele kimpumbulu.

131 Disumu kele kitoko mingi na meso ya yinza, kasi Nzambi ke salaka ve na mutindu yina ya bote. Beno zabaka yawu? Nzambi ke salaka na kikalulu, kikalulu ya mbote.

132 Na Biblia, na Ésaïe 53, kana beno zola kusonika Masonuku. Ya kele na banzila ya Masonuku ya kusonika na lweka awa samu na yawu. Ésaïe 53, Biblia ke tuba na Mfumumu Yesu ya beto, ti, “Ya vwandaka ve na kitoko yina beto zolaka zola na Yandi. Mpe Yandi vwandaka mutindu ya muntu ba ke bumbamaka na kutala.” Ya kele kieleka? Beto zolaka Yandi ve, samu ti Yandi vwandaka ve kitoko. Yandi vwandaka na kutala muntu mosi ya fyoti, ya mapeka ya kubwa, ya ntenta ya kitoko, mpe ba vwanda zola ve Yandi na kuvwanda mfumu. Yandi vwanda talana ve mutindu mfumu. Yandi vwanda zonzaka na mutindu ya bantu nyonso ya bala-bala mpe nyonso yankaka yina, mutindu bantu ke salaka, bantu nyonso, samu na yawu Yandi vwanaka talana ve mutindu ti Yandi vwandaka muntu ya mayela mingi, yina longokaka, ya mbote, na mvwela nzutu nyonso, mpe nyonso. Yandi vwandaka kaka Muntu ya mutindu nyonso. “Ya vwandaka ve na kitoko na Yandi, yina beto zolaka zola na Yandi.” Yandi vwandaka tambulu na kati mpe na ngaanda ya bantu, kubanda ntama, ba zabaka kaka ve Nani Yandi vwandaka. Yandi vwanda talana ve mutindu nzambi na kutambula, landila yina beto lenda banza yina vwandaka nzambi. Kasi, mutindu mosi, Yandi vwandaka!

133 Beno talaka ntangu Mfumumu Nzambi tubaka na—na Samuel, “Kwenda na yinzo ya Isaï mpe kusa mosi ya bana ya yandi ya babakala, ntinu, samu na kubaka kisika ya Saül?”

134 Ntangu yayi, bantu solaka Saül, na yina ti Samuel kieleka kutubaka na bawu na kusala yawu ve. Yandi tubaka, “Nzambi zola ve ti beno kuzwa ntinu; Yandi kele Ntinu ya beno.” Mpe

yandi tubaka, “Mu me tubaka ntete kima na beno, na Nkumbu ya Mfumu, kasi yina kusalamaka ve? Mu me lombaka ntete beno mbongo to *kima yankaka*, samu ti mu zinga?”

¹³⁵ Ba tubaka, “Ve, ata mbala mosi ve ti nge me lombaka beto mbongo. Mpe nyonso yina nge ke tubaka, na Nkumbu ya Mfumu, ya ke salamaka. Kasi beto zola ntinu, na mutindu nyonso,” na yawu ba solaka Saül. Beno tala yina yinza solaka! Beno tala yina Israël kusolaka! Israël, ya kukusa ya Nzambi, ba solaka muntu yina vwandaka yinda mpe ya mapeka na zulu ya muntu nyonso na yinsi; muntu ya nene, ya nene, ya mbote, ya kitoko na kutala, mpe yandi ntangu nyonso vwandaka nzinzi na kati ya mafuta.

¹³⁶ Kasi Nzambi tubaka, “Mu ke sola samu na beno ntinu landila nsodolo ya Munu.” Na yawu Yandi tubaka, “Samuel, Mu ke tuba ve na nge nani yandi kele, kasi kwenda kuna. Yandi kele mosi ya bana ya babakala ya Isai.”

¹³⁷ Mpe Isai, kento ya yandi, mpe bawu nyonso talaka nziunga, tubaka, “Yinga, mwana ya beto ya bakala ya kuluntu, yandi kele nene, yinda, bakala ya kitoko, yandi ke talana kaka ya kulunga samu na yimpu ya ntinu. Yandi kele na mayela. Yandi tangaka. Yandi kele muntu ya mbote. Mu zaba ti yandi ke vwanda kaka ya kulunga. Yandi zabaka kuzonza.”

¹³⁸ Ntangu ba basisaka yandi, Samuel me baka diyuki ya mafuta mpe me kwenda na ntwala ya yandi. Yandi me tuba, “Ve, Mfumu me manga yandi.” Na yawu yandi landilaka nzila nyonso, tii na bana ya babakala sambanu, mpe Mfumu mangaka mosi na mosi ya bawu. Yandi me tuba, “Ya kele na yankaka ve?”

¹³⁹ “Oh,” yandi tubaka, “yinga, ya kele na mosi, yandi kele na manima kuna ke na kutalaka na mameme. Yandi ke vwandaka kaka na manima kuna mpe ke bulaka muziki, mpe ke yimba yawu, mpe ke boka, mpe ke landila. Kasi, yandi kele mwa muntu ya mapeka ya kubvwa, ya ntenta ya mbwaki, yandi ke lenda ve na kuvwanda ntinu.”

¹⁴⁰ Yandi tubaka, “Beno kwenda baka yandi.” Mpe na yina David vwandaka kwiza na ntwala ya profete, profete me kwenda mbangu na mafuta mpe me tsyamuna yawu na zulu ya yintu ya yandi, yandi tubaka, “Yayi kele nsodolo ya Nzambi.” Kitoko ve; kasi kikalulu. Nzambi ke talaka na kikalulu.

¹⁴¹ Muntu ke talaka na kitoko ya kimuntu. Ya ke vunaka. Mpe ya kele samu na yina ba pesaka na kento kitoko yina, samu na luvunu, samu na kuvuna. Kento ya kitoko, kana yandi sadila yawu ve na mutindu ya kulunga, ya kele nsingulu samu na yandi; ya ke fidisa yandi mbangu na difelo kulutila kima nyono yankaka yina mu zaba. Kana yandi kaka. . . Kana yandi lenda vwanda kitoko, kieleka, ntangu nyonso yina yandi ke vwanda na bakala ya yandi mpe ke sala yina kele ya kulunga, mpe ya—ya kele mbote mpe mbote mingi. Kasi yandi lenda baka kima kaka

mosi yina mpe, oh, mutindu yandi lenda vuna na yawu, samu ti ba pesaka yawu na yandi na kusala mutindu yina.

¹⁴² Beno tala, ntangu yayi, kasi Nzambi ke salaka na kikalulu. “Ya vwandaka ve na kitoko yina beto zolaka zola Yesu,” kasi ya vwandaka ve na kikalulu mutindu Yandi, na zulu ya ntoto.

¹⁴³ Ntangu yayi beto ke tala, bubu yayi, ti kikalulu ya dibuundu, Satana mpe nkonga ya yandi, ke tala na nene, na kitoko ya mabuundu, na bima ya kitoko. Ya kele na yina yinza ke tala bubu yayi. “Oh, ya kele pasteur, ya nene *kingandi* ntangu, *yayi-mpe-yayi*, kinganga-Nzambi mingi mpe ya kinzambi, yandi ke belama, na bamvwela yayi ya nene, mpe bima mutindu yina.” Ba ke bokila yawu kitoko.

¹⁴⁴ Kasi basantu ya kieleka ya Nzambi ke tala na kikalulu ya Ndinga yina ba me siamisa.

¹⁴⁵ Ya kele yina basantu kusalaka na kilumbu yina, ntangu ba monaka Yesu. Yandi vwandaka na kima ve ya kutala, kasi ba monaka ti Nzambi vwandaka na kati ya Yandi. Ba monaka ti Nzambi vwandaka na kati ya Yandi.

¹⁴⁶ Mpe ya kele mutindu ti bayina, Joab mpe bantu yina vwandaka na David, mwa muntu mosi, kasi ba monaka muntu yina vwandaka na kati ya yandi. Ba monaka ti Nzambi vwandaka na kati ya yandi, mpe ba zabaka ti yandi zolaka kuma na lutumu kilumbu. Bawu . . . Mosi ya bawu kufwaka bampangi tanu ya babakala ya Goliath, yandi mosi. Mosi kufwaka bantu bankama tatu; ntangu bakento vwandaka lokota madeso samu na madya ya nkokila, mpe ti basoda kwendaka, mpe yandi bakaka dikonga mpe kufwaka bantu bankama tatu, ba-Philistin. Nkadulu! Samu na yinki? Ba kangamaka na lweka ya David. Ba zabaka ti kukusa vwandaka na zulu ya yandi, mpe ba zabaka ti yandi ke kuma na lutumu.

¹⁴⁷ Kizizi ya mbote ya Dibundu bubu yayi yina ke telama na lweka ya Ndinga! Beto zaba ti Yawu ke siamisa yawu. Beto zaba ti Yawu ke kota na lutumu kilumbu. Ata ti Saül . . . Mpe yandi vwandaka kima na bayinsi yankaka, kasi ba zabaka ti yandi zolaka kota na lutumu. Beto zaba ti Yandi ke kota na lutumu, mpe, na yawu beto ke baka Ndinga yango mpe ke telama kaka kuna, ata nyonso yina ya ke lomba. Kana beto fwana kufwa ba-Philistin, to kudumuka na dibulu mpe kufwa nkosi, mutindu mosi kusalaka, beto ke kwenda na mutindu nyonso, samu ti ya kele . . . ya kele mutindu Nzambi salaka yawu na kuvwanda. Beto ke talaka na kikalulu.

¹⁴⁸ Beno lenda ntangu yayi kuyufula munu, “Samu na yinki Yandi pesaka muswa ti ba bongisa kento mutindu yina?” Mu zola ve kubaka ntangu mingi, samu ti mu kele na mingi ya kutuba awa. “Samu na yinki,” kyuvu lendaka basika kuna, “samu na yinki Nzambi kusalaka kento yayi mutindu yayi? Samu na yinki

Yandi pesaka kento muswa ya kuvwanda mutindu yina?” Ya vwandaka samu na bumbote ya kyese ya Yandi Mosi. Kieleka.

¹⁴⁹ Ntangu yayi kana beno zola kubaka Biblia ya beno kaka minuti, beto baka Romains 9, kaka minuti, mpe kulakisa beno kima, mutindu Nzambi ke salaka bima yayi, kana beno zola ku—kutanga yawu. Mpe beto lenda mona awa yina Nzambi ke salaka samu na bumbote ya kyese ya Yandi Mosi. Romains 9:14.

Kuna yinki beto lenda kutuba?

Ya ke na kukondwa kieleka na ntwala ya Nzambi? . . .

¹⁵⁰ Ntangu Yandi solaka Ésaü, to solaka Jacob mpe mangaka Ésaü, ntete ti mosi na mosi ya bana kuzwa muswa ya kusala nsodolo, yandi mosi, ata mosi na mosi ya bawu; ntete ba butuka, ntete na kati ya kivumu ya mama, Nzambi tubaka, “Mu yina Ésaü, mpe mu zola Jacob.” Beno me mona? Samu na yinki?

Samu ti yandi tubaka na Moïse, mu ke kuzwa kyadi na yina mu ke kuzwa kyadi, mpe mu ke sala mambu ya mbote na yina mu zola kusala mambu ya mbote.

Na yawu ya kele ve . . . yandi yina ke zola, to . . . yandi yina ke kima, kasi ya kele Nzambi yina ke talaka mawa.

Samu ti masonuku ke tuba na Pharaon, Mpe samu na lukanu mosi yayi ti mu telemisa nge, samu ti mu lakisa ngolo ya munu na kati ya nge, mpe samu ti nkumbu ya munu kumwangana na ntoto nyonso.

Na yawu . . . yandi (Ntangu yayi beno tala mbote awa) . . . -te . . . yandi kyadi na yina yandi zola kuzwa kyadia, mpe yina yandi zola ti yandi kukumisa ntima ngolo.

Nge ke tuba . . . na munu, Samu na yinki dyaka yandi ke salaka . . . ke sembaka? Samu ti nani me teleminaka luzolo ya yandi?

Kasi nge, O muntu, nani nge kele samu na kutelemina Nzambi? Nzungu ya ntoto lenda kuyufula na kiyidiki ya yandi, Samu na yinki nge me yidika munu mutindu yayi?

Muwumbi ya banzungu ya ntoto, kele mfumu ya ntoto yina yandi ke sadilaka samu na kuyidika nzungu ya mfunu mingi mpe nzungu ya mfunu mingi ve?

Yinki kana Nzambi, ke zola kulakisa nganzi ya yandi, mpe kulakisa ngolo ya yandi, na mvibudulu . . . , yandi vwandaka kukanga ntima na bayinsa vwandaka pesa yandi nganzi mpe lungaka na kuzwa lufwa:

. . . ti yandi zolaka mpe na kulakisa kimvwama ya nkembo ya yandi na sika ya bayina yandi talaka kyadi, bayina yandi kubikaka katuka ntama samu na nkembo ya yandi,

151 Ntangu yayi beno bangula Yawu mbote-mbote na ntangu fyoti. Nzambi kusalaka yawu! Yandi zolaka sala yawu mutindu yayi. Ya zolaka vwanda kuna. Ntangu yayi beno kuwa. Ntangu yayi samu na baminuti tanu, mu zola kunata mabanza ya beno na kima.

152 Yinki kele Nzambi? Nzambi kele Seko ya nene. Na mbandukulu, kuna na bilumbu ya ntama ya vwanaka na mbandukulu, Yandi vwanaka ntete ve Nzambi. Beno zabaka yawu? *Nzambi* kele “kima ya kusambila,” mpe ya vwanaka ve na kima samu na kusambila Yandi. Yandi mosi vwanaka zinga.

153 Mpe na kati ya Yandi vwanaka na binama. Yinki kele kinama? Dibanza. Ntangu yayi beno ke kuzwa kima yina ke zungisa lesu na nkokila yayi. Beno tala, Yandi vwanaka binama ya Yandi yina vwanaka na kati ya Yandi. Ntangu yayi, ya vwanaka na kati ya Yandi na kuvwanda Tata, ya vwanaka na kati ya Yandi na kuvwanda Nzambi, ya vwanaka na kati ya Yandi na kuvwanda Mwana, ya vwanaka na kati ya Yandi na kuvwanda Mvulusi, ya vwanaka na kati ya Yandi na kuvwanda Munganga. Mpe bima nyonso yayi awa ke lakisa kaka binama ya Yandi. Ya kele na kima ve na ngaanda ya nzila. Beno banza ve ti Nzambi kumonaka nsuka na mbandukulu? Kieleka, Yandi kumonaka. Ya kele na kima ve na ngaanda ya nzila, ya ke na kulakisa kaka binama ya Yandi.

154 Ntangu yayi, Yandi zolaka vwanda ve *ya kudedama* mpe kusala muntu kubwa. Yandi zolaka tula yandi na lufulu mosi, ya kimpwanza ya kusola, samu na kusala nsodolo ya yandi mosi, kasi na kuzabaka ti yandi ke kubwa.

155 Ntangu yayi, Yandi lenda ve kuvwanda Mvulusi kana ti kima kuzimbana. Yandi lenda ve kuvwanda Munganga kana ti kima bela. Bima yayi fwana vwanda mutindu yina. Nzambi salaka yawu mutindu yina samu ti binama ya Yandi ya nene kutalana. Kana ya vwanaka na yina ve, Yandi zolaka vwanda ata mbala mosi ve Mvulusi. Kasi beto zaba ti Yandi vwanaka, ntete kwandi ntangu kuvwanda, Yandi vwanaka Mvulusi. Yandi vwanaka Mvulusi, na yawu ya fwana vwanda na kima ke zimbana. Wapi mutindu ya ke vwanda?

156 Kana Yandi baka mpe zimbisa yandi, kaka samu na kuvulusa yandi, kuna ya kele ve na masonga na lusambusu ya Yandi. Yandi zolaka fidisa muntu ve na difelo, mpe kuvwanda ya kudedama. Yandi kele mbote, ya lembami, ya kukwikama, ya kusungama, mpe Yandi kele Zuzi ya nene. Beno me mona, Yandi zolaka sala na kukiteleminka Yandi mosi.

157 Na yawu Yandi zolaka tula muntu na ngaanda awa, mpe kutula yandi na kimpwanza ya kusola, samu ti yandi, na kuzabaka, ti ke kubwa; mpe muntu, na kifwani ya Yandi Mosi, wapi mutindu yandi zolaka kubwa? Ntangu yayi beno ke na kumona Nsemo ya kilumbu? Na yawu, Yandi zolaka sala kima

na nzila ya kima, kubasisa kima na ngidikulu ya ntete. Ntangu yayi beno me mona yawu. Beno me mona? Beno bawu yayi. Beno me mona? Kuna, ya kele yina kubwaka. Yandi salaka yawu, na kuzabaka ti ya ke kubwa. Mpe ya kele ya kutula na maboko ya Satana, mutindu kiyuki samu na nsalulu ya yimbi. Yinki kele na lukumu bubu yayi? Beno banza na yawu. Beno tala mbote ntangu yayi.

¹⁵⁸ Na yina dyaka, samu na yinki ba salaka kento mutindu yayi mpe ve mutindu bakento yankaka, samu na yinki ba salaka kento mutindu yina mpe ve bakento yankaka? Ata mosi ya bakento yankaka ba salaka mutindu yina. Ba kele ve, bubu yayi. Ba lenda ve. Yandi kele ve ya kusala mutindu yina, yandi lenda ve kusala yawu. Samu na yinki Yandi salaka ve kento yayi kuna, kento, kaka mutindu bakento yankaka, na yawu yandi ke vwanda kaka mutindu mosi, ke sansa kaka bana ya yandi? Kuna yandi zolaka kuzwa bakala ya yandi, mpe kuzinga mutindu yina; mpe ntangu ya ke kuma ntangu samu na yandi na kuzwa mwana, yandi zolaka kuzwa mwana ya yandi. Samu na yinki—samu na yinki Yandi salaka yandi mutindu yayi?

¹⁵⁹ Mu lenda ve kutuba bampova yayi. Mpe beno me bakula yina mu ke na kuzonzila, mutindu yina ve? Kana beno me zaba, beno tuba, “amen.” [Dibuundu me tuba, “Amen.”—Mu.] Yinga. Beno me mona? Ya kele na bantwenya ya bakento ya kuvwanda awa, mpe bantwenya ya babakala, beno me mona. Kasi beno zaba, kibulu fwana kuma na ntangu mosi ya mvula, na manima na mpangi ya yandi, kuna yimeni. Kasi, kento, ya kele konso ntangu. Mpe samu na yinki Yandi salaka yandi mutindu yayi?

¹⁶⁰ Ntangu yayi beno tala mbote ndandani ya Yandi ya nene kufunguka, na yina beto ke na kulandila awa ntangu yayi, kaka ya kulunga mutindu ya lenda vwanda ya kulunga. Mu zabaka yayi ve tii kilumbu yankaka yina.

¹⁶¹ Samu na yinki Yandi salaka ve yandi mutindu yina na mbandukulu, mutindu bakento ya Yandi yankaka? Samu ti ya ke vwanda ve ya kulunga samu na Yandi na kusala mutindu yina. Yandi kele Yinto ya maza ya kuvedila nyonso. Ya kele samu na yina Yandi zolaka bika Satana kusimba yandi, kusala yina yandi salaka na kubebisa. Kivangu ya mutindu zolaka vwanda, zolaka vwanda ya kukuma ve ya Yandi, na kusala ya ntete.

¹⁶² Bisalu ya Yandi nyonso yina Yandi salaka, na ntete, ya kele na kati ya kulandila. Bisalu ya Yandi nyonso vwandaka na kati ya kulandila. Yimbwa ya kento, yimbwa ya bakala; beno me mona, ngombe ya kento, ngombe ya bakala; nyonso kele na kati ya kulandila. Yinza nyonso kele na kati ya kulandila. Nkuna ke kufwa, ke kwenda na kati ya ntoto; kaka mutindu lufwa, kiziku, mvumbukulu. Maza ya yinti ke kwendaka na yisi ya yinti, ke bika makasa ya yandi kubwa, ke vutuka mvula yina ke landa na mvumbukulu ya makasa ya malu-malu. Beno me mona yina

mu zola kutuba? Nyonso, mpe yinza, ya Nzambi, kele nyonso ya kulandila, na mosi; mpe awa kele na mosi yina ba salaka na ngaanda ya kulandila ya Nzambi. Yinza kele kieleka ya kusala samu ti ya lenda sumuka ve. Beno banza! Ngidikulu ya ntete, ya Nzambi, zolaka sumuka ve.

¹⁶³ Oh, beno ke na kumona yawu ntangu yayi, na kutalaka yayi awa, kubeba ya dibuundu? Ya ntete kele Ndinga ya Nzambi! Ya kele na ata disumu ve na Nzambi. Beno me mona yinki mu zolaka kutuba? Awa kele kivangu yina me kota na luzingu na nzila ya kubebisa. Nzambi ke kuzwa Dibundu, kasi beno tala kima ya kubeba yayi yina kele na bawu awa.

¹⁶⁴ Nzambi ke na bakala mpe kento. Kasi, kento yayi, beno me mona, bidimbu ya mantwala ya kieleka ya yawu ke na kulakisa yinki vwanda na dibanza ya Nzambi. Beto lenda baka ngunga mosi, to zole, mpe kupesa yawu nsemo. Kento . . . Salaka kivangu yayi samu na mutindu yina, Yandi salaka kivangu mpe salaka yandi samu ti Satana simba yandi, mpe yandi salaka. Yandi kele dyaka ya kusimba yandi. Yandi ke sala mbote na kukima na Kulunsi, mutindu mosi bakala, mpe.

¹⁶⁵ Beno tala, yinza nyonso ke tambulaka na kulandilaka. Kana Yandi salaka kento na mutindu ya ngidikulu ya ntete, ya zolaka vwanda ve na disumu, samu ti yandi zolaka sala yawu ve, yandi zolaka sala yawu ve. Yandi kele kubeba ya ngidikulu ya ntete.

¹⁶⁶ Na yawu disumu nyonso kele kubeba ya Kieleka ya ntete! Yinki kele luvunu? Ya kele Kieleka ba me bebisa. Yinki kele pité? Ya kele mutindu ya kusala ya kulunga ba me bebisa. Na yawu beno tala kivangu ba me bebisa, beno tala kima ya muvimba ba me bebisa. Mpe muvimba ya kima ba ke tangunaka d-i-s-u-m-u, ya kuvwanda kaka kuna. Ya kele samu na yinki kyuvu yayi kele mingi mfunu.

¹⁶⁷ Kaka ndambu, kitini, yina muntu me sala, samu na kuvuna bakala; Nzambi salaka yawu, kaka awa me lakisa yawu. Ya kele samu na yina ba salaka kento.

¹⁶⁸ Kento ya kukondwa bumuntu kele kima ya kulutila yisi yina ba lenda banza na ntoto. Beno lemvočila munu yayi, bantwenya ya bamama. Yandi kele kima ve kasi poubelle ya bantu, mutalaka ya sexe. Tala yina yandi kele, kento ya kukondwa bumuntu, yandi kele poubelle ya sexe ya bantu, ya nsambukila, kisika ya kukondwa bunkete, ya mvindu, ya busafu, mvindu ya nsoni kele ya kunatama na yandi. Samu na yinki ba salaka yandi mutindu yayi? Samu na kuvuna. Konso disumu yina vwandaka ntete na zulu ya ntoto kwisaka na nzila ya kento.

¹⁶⁹ Mpe muntu ya ba-analyse kaka na Chicago, kento mosi—mosi sonikaka mukanda yayi, na bapulusu, ba talaka, na États-Unis, na bayinsi ya nene ya États-Unis, ti, “Makumi yivwa na nana na zulu ya nkama ya konso kufwa muntu yina kusalamaka

ntete na mutindu nyonso, na États-Unis, ya vwandaka to kento kele na kati yawu to na manima ya yawu.”

¹⁷⁰ Ntangu yayi mu ke na kutubaka nyonso yayi, samu na kukuma na kima mosi awa na nsuka, samu ti beno kumona yinki kele dyambu.

¹⁷¹ Ba salaka yandi samu na kuvuna, mutindu yandi salaka Adam na mbandukulu, na kutubaka na yandi ti mbuma vwandaka mbote, mpe nyonso yina, samu na kuvuna yandi mpe samu na kukatula yandi na nzila ya Ndinga. Ya kele mutindu dibuundu ke salaka bubu yayi, kima mutindu mosi.

Kasi kuna, na manima ya yina, bakala kumaka mfumu ya yandi, samu na kuyala na zulu ya yandi.

¹⁷² Ntangu yayi wapi luswaswanu na kilumbu yayi, na kilumbu yayi ya dibanza. Na kisika bakala kuvwanda mfumu ya kento, kento me kuma nzambi ya yandi. Kieleka, kento ke yala na bakala. Ntangu yayi na kutala beno lenda kukondwa ntembe kubakula mbote samu na yinki mu vwanda bulaka na ngolo. Na nzila ya kitoko ya yandi mpe kuzaba ya yandi ya kuvukisa banzutu, nzutu ya yandi yina ba pesaka yandi na Satana, kima na nzila ya kima yina Satana salaka, ba fidisaka yandi samu na kuvuna bana ya babakala ya Nzambi. Mpe yandi lenda kotisa mingi ya bawu na difelo kulutila kisadilu nyonso yankaka yina Satana kele na yawu. Ya kele kaka kieleka.

¹⁷³ Mu ke na kuzonzila ntangu yayi na bayina kele ya kukondwa nkadulu ya buzitu, beno ve bampangi ya bakento. Beto ke pesa beno kisika ya beno, kisika ya kulunga, na baminuti fyoti, na kati ya Ndinga ya Nzambi awa. Ya vwandaka manaka ya Nzambi katuka kubanda—mbandukulu.

¹⁷⁴ Ntangu yayi na kusala yayi bubu yayi, nani kele nzambi ya États-Unis? Beno bambuka moyo na tabernacle na bamvula me luta, mu longaka na yawu? Nzambi ya bilumbu yayi, mwa ntwenya ya kento ya kuvwanda kuna na bakupakula, mpe robe ya kunanguka na zulu ya mabolongo, mpe bima ya mutindu yina. Mu tubaka, “Beni tala nzambi ya beno!” Mpe ya kele ya kulunga, yandi kele na konso luzabusu ya nsuka ya zulunale, ya kulwata ndambu kinkonga. Yandi kele na bala-bala, mutindu mosi.

¹⁷⁵ Ya kele kisalulu ya Satana, “katuka mbandukulu,” tubaka Yesu. Beno me mona? Beto ke mona ti ya kele mutindu yina ntangu yayi, mpe “katuka mbandukulu,” mpe yina Yandi ke na kuzonzila.

¹⁷⁶ Ntangu yayi, mimpani vwanda salaka yandi nzambi, (beno zaba yawu?) nzambi ya kento. Kieleka ba salaka. Ba vwanda sala yandi nzambi ya kento, samu ti ba vwandaka na bisalu ya kuvukisa banzutu na kusambila ya bawu. Ba vwanda tubaka ti, “Yandi vwandaka kiyidiki. Na kati ya kivumu ya yandi yandi

ke nataka nkuna mpe ke vangaka.” Ya kele luvunu. Ya kele kaka na Kiyidiki mosi, ya kele Nzambi. Kasi beno ke bambuka moyo na Paul kuna? “Diane, ya Éphèse,” kifwanisi ya ditadi, ba vwandaka tuba, “nzambi ya kento ya Mazulu, yina ba me losa na yisi.” Beno ke mona ve mutindu kusambila ya mimpani kele?

¹⁷⁷ Mpe beto, na kuzabaka yawu ve, kubalukaka kaka mbala mosi na kusambila dyaka ya mimpani, na bakento, kivangu ya kulutila mingi yisi na zulu ya ntoto, nsambulu ya kento! Yandi ke kotisa bakala mutindu nyonso yandi zola. Mpe na kuzabaka ve, kitoko nyonso yina na ngaanda, ti difelo kele na kati. Salomon tubaka, “Ya yandi, bankotolo ya yandi kele bankotolo ya difelo.”

¹⁷⁸ Ntangu yayi beto ke mona pwelele awa yina Yesu zonzaka na Apocalypse, kapu ya 2 mpe na nzila ya 15, na malongi ya ba-Nicolaïte, dibuundu yina zolaka kwiza mpe ke kwenda ntama na Ndinga.

¹⁷⁹ Mpe beto lenda kumona awa, pwelele, bansamununu yayi ya mpamba-mpamba, ya yimbi, ya kutsyema ve yina kele na beto na televizyo, ya bantinu ya bakento ya sexe. Beto lenda mona kutsyema ve ya mbanza yayi, mutindu bana yayi, mwa bantwenya ya bakento kutambula na kuninganaka awa na bala-bala, na mwa bilele ya nkufi, ya kukangama na nzutu, na kuzukisaka, mpe ya kele madidi mingi ti ya ke kangisa bawu tii lufwa. Ba zaba ve ti ya kele fyabulu ke na kusalaka yawu. Ba kele ya kuyala na mpeve ya yimbi, kasi ba zaba yawu ve! Beno ke mona ve yimbwa ya kento kusala yawu, beno me monaka? Beno ke mona ata kento yankaka kusala yawu, mpe ata bakala ya mbote ke belama na yandi, ata.

¹⁸⁰ Beno me mona, ntangu yayi beno ke na kuzwa kifwanisi? Beto ke lakisa kima kaka na ntangu fyoti, kana Mfumu zola.

Ntangu yayi beno ke na kumona ba-Nicolaïtes, beno ke na kumona malongi ya bawu.

¹⁸¹ Beno ke mona bantwenya ya bantinu ya bakento, mutindu ba ke bokila bawu, ba-stripteaseuse na bala-bala kuna. Ya vwandaka vwanda samu na kumona striptease, beno zolaka kwenda na kimpa mosi ya buzoba kisika mosi. Beno fungula kaka meso ya beno, beno tala na bala-bala, ya kele kaka yina beno fwana sala ntangu yayi. Kima ya muvimba kele striptease. Kieleka. Samu na yinki ba ke salaka yawu? Samu na kuvuna, na kumeka, ya kele kaka samu na kima yina ti yandi lenda kusala yawu. Yandi ke salaka yawu samu ti yandi kele kutsema ve. Yandi ke salaka yawu samu ti ba salaka yandi mutindu yina. Yandi ke na kubakula ve ti yandi kele kisadulu na maboko ya Satana, mpe ya kele yina yandi kele.

¹⁸² Mpe na balukolo ya beto bubu yayi, ba ke na kulongisa bansalulu ya kuvukisa banzutu. Yinza ya beto ya kupola ya nsambulu ya kento! Mu zaba ti ba zola ve kukwikila yawu. Ba ke telama mpe ke yimba mwa nkunga mosi, mpe nyonso yina, na

kilumbu mosi; mpe na ngaanda na bakento, ke tambula bisika nyonso, mpimpa nyonso ya muvimba. Beno me mona? Mbote mingi. Na yina, na meso ya Nzambi, Ndinga, kento kele ya yisi mingi na bibulu nyonso yina Nzambi tulaka na zulu ya ntoto. Beno tala mbote.

¹⁸³ Ya kele samu na yina Nzambi niminaka yandi na kulonga Ndinga ya Yandi. Ya kele kieleka. Timothée ya Ntete kapu 2:9-15, “Mu me pesa muswa ve na kento na kulonga, to na kuzwa lutumu nyonso.” Beno me mona? Mpe dyaka ya Ntete ya Corinthiens 14:34, “Ti bakento ya beno kuvwanda swi na mabuundu, samu ti muswa me pesama ve na bawu na kuzonza, samu ti ba me lomba bawu na kuvwanda swi; mutindu mpe me tuba Musiku.” Kasi, bubu yayi, yinki ke salaka dibuundu? Ba ke tulaka yandi bapasteur, ba-evangeliste, na yina Biblia na muvimba ke yimina yawu. Mpe Biblia ke tuba, “mutindu mpe me tuba Musiku,” kusala yawu kutambula na kulandila, kima ya muvimba.

¹⁸⁴ Kaka mutindu Mwana ya dimeme vwandaka, mazono na nkokila, kisika kaka ya kusambila, na yisi ya Menga ya Mwana ya dimeme yina basikaka. Ya kele kisika kaka bubu yayi, na kati ya Klisto. Mutindu kaka beno ke sala kele kukota na kati ya Yandi. Ya kele kisika kaka ya kusambila. Ya ke vwandaka ntangu nyonso mutindu yina. Kisika kaka samu na kusambila kele na yisi ya Menga yina basikaka.

¹⁸⁵ Na yawu ntangu yayi beto ke mona kifwanisi nyonso ya muvimba ya yawu kufungama na beto. Beno tala kento. Ya kele samu na yina Nzambi ke bika ve yandi kulonga, ke bika ve yandi kusala kima nyonso na dibuundu kasi kuvwanda swi na vwale na kizizi.

¹⁸⁶ Ntangu yayi beno lenda mona samu na yinki mu vwandaka tuba bima yayi mpe kusala bima yina mu vwandaka sala, na kuzabaka nyonso yayi na kati ya ntima ya munu, mpangi ya bakala, mpangi ya kento? mu zaba, bampangi ya bakento, mu kele... beno kele na kisika ya beno (kaka mwa ntangu fyoti), mpe kikalulu ya mbote yina Nzambi lenda sala na kati ya beno. Kasi mu ke na kumeka kaka na kuzonzila na lweka yankaka, samu na kulakisa kieleka kisika beno katukaka, “na mbandukulu.” Yesu tubaka na beto na “kuvutuka na mbandukulu,” samu na kumona yawu. Ya kele yina beto ke na kusala.

¹⁸⁷ Ntangu yayi mu vwandaka me vwanda ya kukwika na kusuka na mabanza ya nene na zulu ya yayi, mpe mu banza ti beno me bakula yawu. Mpe na beno bantu yina ke vwanda na kuwa na bande yayi, mu banza beno ke bakula. Kaka kuvutuka manima. Ya kele kaka samu na kulakisa yina Yesu tubaka, “Beno vutuka, katuka mbandukulu, mpe beno tala.” Na bima nyonso, beno vutuka na mbandukulu. Beno lenda mona, bubu yayi.

188 Samu na yinki, bantu, bawu ke tubaka ti mu ke yinaka bakento. Yina kele ntama mingi katuka na Kieleka. Mu kele ve. Ba ke bokilaka, “Muntu ke yinaka bakento.” Beno bambuka moyo, ba bokilaka Paul muntu ke yinaka bakento. Mulongi mosi ya kento, ntama mingi ve, tubaka, “Oh, nge kele mutindu kiboba ya Paul, nyonso yina yandi zolaka sala kele kutuba na ngolo na zulu ya beto bakento.”

189 Santu ya Nzambi, yina vwandaka na muswa ya kusonika Biblia, Ngwisani ya Malu-malu, mpe kutemina na Bandinga ya yandi? Yandi tubaka, “Kana Wanzio kukatuka na Mazulu kulonga kima nyonso yankaka na Yayi yina mu tubaka, ti Yandi vwanda ya kusinga,” ti kubika longi mosi ya kento.

190 Ba vwandaka tuba ti Élie vwanda yinaka bakento. Yandi vwanda yinaka ve bakento, bakento ya tsyelika. Yandi zolaka kaka ve ba-Jézabel yayi.

191 Mpe kana ya kele mutindu yina, mutindu yina fwana vwanda Nzambi fwana vwanda mutindu mosi, samu ti Yandi kele Ndinga yina ke kwizaka na baprofete. Na yawu ya fwana vwanda Nzambi, mutindu mosi, na yawu, beno me mona, Yandi zaba ngidikulu ya ntete, “katuka mbandukulu,” Yandi tubaka, “katuka mbandukulu.” Ba vwandaka baprofete na bayina Ndinga vwandaka kwisa.

192 Mpe Yandi salaka yandi samu na bakala, mpe ve bakala samu na yandi. Beno zaba yawu, ti, “Ba salaka kento samu na bakala, mpe ve bakala samu na kento”? Bantu yikwa zaba yawu? Biblia ke longisaka yawu. Mbote mingi. Ba pesaka yandi kisika na bakala, ntete kubwa, mutindu mosi na zulu ya ngidikulu nyonso. Kasi “na manima” ya kubwa, ntangu yayi awa beto ke tala dilongi. Kasi “na manima” ya kubwa, yandi vwandaka mfumu ya yandi, yandi fwana vwanda swi na mambu nyonso, ntangu yayi na manima mbandukulu ya ntete me nsuka.

193 Yesu tubaka, “Ya vwandaka ve mutindu yina na mbandukulu.” Ya kele ntangu ntangu kubandaka, ntangu Nzambi salaka yawu ntete na kivangu ya Yandi ya ntete. Beno nyonso yina me bakula, beno tuba “amen” dyaka. [Dibuundu me tuba, “Amen.”—Mu.] Na mbandukulu Nzambi yankaka kaka bakala mosi mpe kento mosi. Kasi kuna ba salaka kento mutindu yankaka na bibulu, na bibulu nyonso yankaka, samu na kuvuna. Ntangu yayi beno tala mbote awa, “Ya vwandaka ve mutindu yina na mbandukulu.” Ba salaka yandi, kana yandi vwandaka na mutindu ya ntete, yandi zolaka ata fyoti ve kuvwanda na kubwa ve. Kasi yandi nataka kubwa mpe kuzenga yina zengaka kulandila ya muvimba ya Nzambi, mpe losaka lufwa, mawa, mpe nyonso yankaka, na zulu ya ntoto. Ba salaka yandi mutindu yina.

194 Ntangu yayi beno tala. Ntangu yayi, *na manima* ya mbandukulu, *na manima* ya mbandukulu, *na manima* ntangu

kubandaka; ntama na manima kuna, ya vwandaka na Seko, ya me suka. Beno tala, na manima ba salaka kubwa yina na nzila ya Ève, na manima ya kubwa, ya vwandaka na nsatu ba sala ngwisani yankaka. Ntangu yayi yayi ke budisa beno dibaku, kasi mu ke pesa beno Masonuku samu na kulakisa ti yayi kele Kieleka. Ntangu yayi beno tala na manima ya kubwa, Yesu tubaka. . . Nzambi, na mbandukulu, kusalaka mosi ya konso mutindu; kasi ntangu yayi, na manima ya kubwa, ntangu yayi beto ke na kukwenda kulutula yawu. Ngwisani vwandaka kuvwanda mutindu mosi; kasi ntangu yayi, na manima ya kubwa, ya kele na ngwisani yankaka ba me sala. Ntangu yayi yandi zolaka dyaka ve kuyala na yandi, mosi na mosi fwana kuzwa ngwisani ya kukabuka.

¹⁹⁵ Ntangu yayi beto mona kana ya kele kieleka. Ti beto baka Genèse 3, mpe kutala kana yayi kele kieleka, ntangu yayi na yina beto ke na kulandila na kukwenda, samu ti beto zola kuvwanda tsyelika na bima yayi, yina ke na kulongama mpe ke na kubasika ti ya kele kaka kieleka. Na yawu ti mu banza ti beto kele na mwa ntangu, samu ti beto kele dyaka ve ntama na kumanisa awa, samu na kukuma na kitini ya kusukisa dilongi, samu na kulakisa *samu na yinki* mpe *yinki* me tala bakufwa makwela, mpe nyonso yina. Ntangu yayi na Genèse kapu ya 3, mpe beto ke banda ntangu yayi na kapu ya 3, mpe na nzila ya 16. Ti beto banda na nzila ya 14.

Mpe MFUMU . . . tubaka na nyoka, (awa Yandi ke singa yandi), Samu ti nge me—nge me sala yayi, nge me singa na zulu ya baniama, . . . na zulu ya konso niama ya mfinda; mpe na zulu ya kivumu ya nge ke tambula, mpe nge ke kudya fundu-fundu bilumbu nyonso ya luzingu ya nge:

Mpe mu ke tula bumbeni na kati-kati ya nge mpe kento, mpe na kati-kati ya nkuna ya nge mpe nkuna ya kento; mpe yandi ke dyata nge na yintu, mpe nge ke tatika yandi na kinkoso ya yandi. (Nsilulu, “yina ke kwiza na nzila ya kento,” Mesiya, samu na kuvuukisa.)

Na kento yandi tubaka, . . .

¹⁹⁶ Ntangu yayi beno tala, awa ya kele na ngwisani na nyoka. Yina, nyonso vwandaka mbote mingi na ntangu ya ntama, na mbandukulu, to ntete mbandukulu.

Na kento yandi tubaka, mu ke bwela dyaka mawa ya nge mpe kubuta ya nge; mpe na kati ya mpasi nge ke buta bana; mpe bansatu ya nge ke vwanda na bakala ya nge, mpe yandi ke yala na zulu ya nge, (Kuvwanda dyaka ata fyoti ve kintwadi mutindu mosi.)

¹⁹⁷ Ntangu yayi kento me baluka kaka, mpe yandi kele mfumu.

Mpe na Adam yandi tubaka, Samu ti nge me kuwa na ndinga ya kento ya nge, mpe me kudya ya yinti, ya yina mu tumaka nge, na kutubaka, Nge ke kudya . . . yawu ve: singulu kuvwanda na ntoto (me singa Adam ve, ntangu yayi) singulu ke vwanda na ntoto samu na nge; na mpasi nge ke kuzwa ya kudya na yawu bilumbu nyonso ya luzingu ya nge;

Matiti ya bansende . . . mpe bayinti ya bansende yawu ke pesa nge; mpe nge ke kudya matiti ya mfinda;

Mpe ya kele na mutoki ya kizizi ya nge ti nge ke kudya dimpa, tii nge ke vutuka na ntoto; kisika—kisika ba bakaka nge: samu ti nge kele ntoto, mpe na ntoto nge ke vutuka.

¹⁹⁸ Bangwisani zole. Ntangu yayi yina ke kanga “mbandukulu,” ya yina Yesu tubaka, “Ya vwandaka ve mutindu yina na mbandukulu.” Beto kele na ngwisani yankaka ntangu yayi. Beno tala, ya kele ngwisani yankaka. Ntangu yayi ya kele na ngwisani samu na kima, mpe kima na nzila ya kima. Beno tala, kubwa kunataka muvusu, lufwa, na konso kivangu ya ngidikulu, na kusalaka luswaswanu na yinza nyonso. Ntangu yayi beto tala yina Yesu tubaka na zulu, “katuka mbandukulu ya vwandaka ve mutindu yina.” Ntangu yayi ya kele ve mutindu yina “katuka,” ya kele ntangu yayi ya kele “na manima” na mbandukulu. Ntangu yayi ya kele na ngwisani ya mbala zole.

¹⁹⁹ Ya ntete vwandaka kaka ngwisani, Adam na Ève vwandaka mutindu mosi, bakala mosi mpe kento mosi. Ntangu yayi kento sumukaka, mpe (yinki yandi ke sala?) ya me losa bawu nyonso na lufwa, mpe Nzambi zolaka sala ngwisani na nzila ya yina, ngwisani yankaka. Yawu yayi kaka awa na Genèse 3:16, Yandi salaka ngwisani yankaka.

²⁰⁰ Ntangu yayi yinza fwana kufuluka na bantu, ve na nzila ya ngidikulu ya Nzambi ya ntete, mutindu na mbandukulu, ve na nzila ya ngidikulu ya ntete, kasi na nzila ya nsatu ya kuvukisa banzutu. Ntangu yayi yina ke sukisa “mbandukulu,” mutindu yina ve? Na mbandukulu ya vwandaka kaka na bakala mosi mpe kento mosi, bakala mosi mpe kento mosi; kasi ntangu yandi sabukaka ndilu yina mpe nataka disumu yayi, ntangu yayi yinza fwana kufuluka na bantu dyaka, na nzila ya kuvukisa banzutu, ve na nzila ya ngidikulu; na nzila ya kuvukisa banzutu. Beno me mona kisika kento kele ntangu yayi? Ntangu yayi, kasi ya kele mutindu yinza ke na kufuluka bubu yayi, na nzila ya kento.

²⁰¹ Ya kele samu na yina Yesu zolaka kwiza na nzila ya kento, samu na kuvutula yawu na mbandukulu ya yawu ya ntete dyaka, kukondwa nsatu ya kuvukisa banzutu. Mbutukulu ya Yandi kele ya bumwense. Kasi, alleluia, ya ke kwiza ntangu kisika ya ke vwanda na kuvukisa banzutu dyaka ve, kasi Nzambi ke bokila bana ya Yandi na fundu-fundu ya ntoto, ba ke vwanda dyaka

mutindu na ntete, ve na nzila ya kento mosi; kasi na nzila ya kusala ya ntoto mpe minda ya yinza, mpe pétrole, Yandi ke vanga dyaka mutindu Yandi salaka Adam na mbala ya ntete. Yesu salaka yayi kusalama, na nzila Nzambi na kusalaka Yandi mosi Muntu mpe kotaka na yinza samu ti Yandi kufwa, na nzila ya kento yayi. Ntangu yayi ya kele ntangu ya kutesa, na nzila ya disumu.

²⁰² Ntangu yayi beno ke mona kuna, “na manima” na mbandukulu, ya vwandaka na kima yankaka ba kotisaka. Ntangu yayi yayi ke sala beno mpasi. Beno me lemba? [Dibuundu me tuba, “Ve.”—Mu.] Beno vwanda kaka swi mwa ntangu dyaka.

²⁰³ Na yina ntangu ba salaka ngwisani ya bambala zole na nzila ya bakala mpe kento, na nzila ya kuvukisa banzutu, ngwisani nyonso yankaka (ngwisani ya ntete ve, kasi ngwisani yankaka), ntangu yayi yinki ya ke kotisa? Polygamie, na kati ya nyonso. Kuna, na manima ya mbandukulu, ba kotisaka polygamie na kati ya bantu mpe baniama; na manima ya mbandukulu, kubwa. Nzambi ntangu yayi, na ya zole, salaka yinza ya malu-malu dyaka, na nzila ya kuvukisa banzutu. Nzambi vangaka ya ntete kukondwa kuvukisa ya banzutu. Beno me kwikila yawu? Ntangu yayi ya kele ngwisani yankaka na yinza, Yandi salaka yawu na kitezo yankaka, na nzila ya kuvukisa banzutu. Ngwisani ya zole: bakala mosi, bakento mingi; mbambi ya bakala mosi, na nkonga ya bambambi ya kento. Ya kele kieleka? Ngombe mosi ya bakala, na mameme mingi, bangombe ya bakento; nsusu ya bakala, na ngaanda ya kufuluka na bansusu ya bakento. Ya kele kieleka? David mosi, landila ntima ya Yandi mosi, na bakento bankama tanu; na nkama ya bana ba me butila yandi, na mvula mosi, na bakento ya kuswaswana, um-hum, muntu landila ntima ya Yandi mosi Nzambi. Salomon mosi, na funda ya bakento. Kasi beno tala ntangu yayi, ya vwandaka ve mutindu yina na mbandukulu, kasi ntangu yayi ya kele “na manima” ya mbandukulu. Kento me sala yayi, kuna yandi me kuma kaka yina yandi kele ntangu yayi. Beno me mona?

²⁰⁴ David, ntinu yina monikisaka Klisto! Beno simba yawu na yintu ya beno. David monikisaka Klisto. Beno ke kwikila yawu? Klisto kele ya kuvwanda . . . ke kwenda vwanda na kiti ya yandi ya kimfumu. Mpe David yayi, muntu landila ntima ya Yandi mosi Nzambi, kuzwaka bankama tanu ya bakento. Beno me mona yina mu zola kutuba? David na bankama tanu ya bakento ya yandi, Salomon na funda ya yandi. Mpe Salomon kele mwana ya David, na kimuntu; yina monikisaka Yesu Klisto, Mwana ya David, na kimpeve. Kasi ya kele ya yinza, luzingu ya kuvukisa banzutu. Yayi ke vwanda ya kimpeve, ya kuvanga, samu na yinki, ya kuvanga. Beno me mona? Ya kele mutindu ya vwandaka na mbandukulu, kasi ve ntangu yayi na luzingu yayi beto ke na kuzinga na bubu yayi.

205 Beno tala, beno kondwa yayi ve ntangu yayi, beno baka yawu nyonso na bantima ya beno. Kasi ata mosi ya bakento yango zolaka kwandi kuzwa bakala mosi dyaka. Bakala kele ngidikulu ya ntete, kento ve. Ata mosi ya bakento yango zolaka kuzwa bakala mosi dyaka, kasi bakala mosi yina zolaka kuzwa funda ya bakento. Ya kele MUTINDU ME TUBA MFUMU. Ya kele Biblia. Ntangu yayi mu vwandaka me vutuka na manima, me baka ntangu ya munu mpe me lakisa beno kisika ya bandaka kuna, yina Yesu tubaka. Ntangu yayi beno ke mona yawu pwelele? Ba zolaka kuzwa lutangu . . .

206 “Oh,” beno ke tuba, “yina vwandaka kaka samu na Israël.” Kieleka?

207 Ntangu Abraham nataka Sarah na yinsi ya ba-Philistin, ya vwandaka na ntinu kuna yina nkumba vwandaka Abimélec. Mpe Sarah vwandaka na bamvula nkama, pene-pene na bamvula nkama, kasi yandi sobaka na kuvutukaka ntwenya ya kento mpe kumaka kitoko. Beno zaba yawu? [Dibuundu me tuba, “Amen.”—Mu.] Mbote mingi. Mpe Abimélec vwandaka zola kuzwa mutindu kento. Beno ke bambuka moyo na Nsangu ya munu na zulu ya yawu? Abimélec vwanda zola kubaka Sarah mutindu kento ya yandi. Kukondwa ntembe yandi vwandaka na nkonga ya bakento, kasi yandi zolaka baka yandi ve kana yandi vwandaka ya kukwela na Abraham. Na yawu Abraham tubaka na Sarah, “Tuba ti nge kele, ‘mpangi ya munu ya bakala,’ samu ti yandi ke kufwa munu samu ti yandi kuzwa nge.” Samu na yinki yandi basisaka kaka ve Abraham na ngaanda ya yinsi, mpe kubaka kento ya yandi mpe kulandila? Ya vwandaka kaka ve musiku na mikwikidi, kasi samu na bantu nyonso na ngidikulu. Musumuki to santu, ya kele na zulu ya yintu ya beno, bakala, samu na bisalu yayi. Ya vwandaka ntinu ya mimpani. Bantu yikwa zaba ti disolo yango kele kieleka? [“Amen.”] Ya kele Biblia, na Genèse, na kutala kapu ya 16, mu banza.

208 Beno tala, Abimélec zolaka baka yandi mutindu kento. Yandi kukubamaka yandi mosi na kuzwa mwana ya kento ya malu-malu ya Hébreux yayi. Mpe yandi tubaka, “Yayi kele ya munu . . .” Kento tubaka, “Yayi kele mpangi ya munu ya bakala.”

Bakala tubaka, “Yayi kele mpangi ya munu ya kento.”

209 Mpe Abimélec tubaka, “Na yina mu ke baka kaka yandi mutindu kento.” Beno lenda banza bakala kusala kima mutindu yina? Kasi yandi salaka yawu.

210 Mpe kuna na mpimpa yina, na yina yandi kwendaka na kulala, Mfumu kumonikaka na yandi na ndosi, mpe tubaka, “Abimélec, nge kele mbote mutindu muntu ya kufwa.” Yandi vwanda keba yawu, nsinga yango ya menga ya ba-Juif kuna, beno me mona. Yandi tubaka, “Nge kele mbote mutindu muntu

ya kufwa. Nge me kuzwa kento ya muntu yankaka yina nge ke na kukubikaka na kukwela.”

211 Yandi tubaka, “Mfumu, Nge zaba kusungama ya ntima ya munu.” Yandi tubaka, “Yandi ve vwandaka me tuba na munu ti ya vwandaka ‘mpangi ya yandi ya bakala’? Yandi mosi ve vwandaka me tuba, ‘Ya kele mpangi ya munu ya kento?’”

212 Yandi tubaka, “Mu zaba kusungama ya ntima ya nge, ya kele samu na yina Mu me pesa ve muswa ti nge sumuka na ntwala ya Munu.” Ya kele kieleka? Yandi tubaka, “Vutula kento ya yandi, samu ti bakala yina kele profete ya Munu. Mpe kana nge vutula yandi ve kento ya yandi. . . Mpe bika yandi kusambila samu na nge, nganga-Nzambi ya beno ve. Kana yandi sambila ve samu na beno, yinsi ya nge ya muvimba me manisa.” Amen. Ya kele lemvo ya kuyituka. Kieleka. “Yinsi ya nge ya muvimba me manisa. Ya kele kento ya bakala yina, mpe yandi kele profete ya Munu.” Amen. Ya kele MUTINDU ME TUBA MFUMU. Ya kele Masonukwa. Kieleka.

213 Ntangu yayi beto me mona, dyambu nataka lufwa. Lufwa kele ndandu ya disumu ya kento, yina kwizaka na nzila ya kento mpe ve na bakala. Na mutindu ya yandi ya kuzinga luzingu ya yandi, mpe na nzila ya yandi, lufwa nyonso me kwiza. Mutindu ya yandi ya kupesa luzingu kele lufwa. Bantu yikwa zaba yawu? Job 14, kana beno zola kusonika Masonuku.

214 Mu ke, kana beno yufula yayi, mu ke na Masonuku ya kunotika samu na konso kitini ya yayi.

215 Kana beno zola kutanga Job 14 kuna, Yawu ke tuba, “Muntu yina kele ya kubutama na kento kele ya bilumbu fyoti, mpe ya kifuluka na bampasi.” Ya kele kieleka? “Yandi ke basika mutindu lololo, ba ke zenga yandi, mpe ke kondwa ngolo,” mpe nyonso yina. Beno me mona? Konso muntu yina me butama na kento, yandi kele ya kubutuka na lufwa ntangu nyonso yina yandi ke kwiza.

216 Kasi ntangu yandi ke butama na kati ya ngidikulu ya Nzambi, yandi lenda ve kufwa; yandi kele ya Yinti yankaka yina yina vwandaka na nsaba ya Éden, Klisto. Luzingu ya Seko kukwizaka na nzila ya Yinti.

217 “Oh,” beno ke tuba, “kento vwandaka yinti?” Kieleka. “Mbote, ba tubaka, ‘Nge ke baka ve ya yinti yayi.’ Nzambi tubaka, kuna na Genèse, ‘Nge ke baka ve ya yinti yayi.’”

218 Mbote, kento kele yinti. Yandi kele yinti ya bambuma. Beno kele mbuma ya mama ya beno. Mbuma ya kivumu kele beno. Ya ke kieleka. Mpe na yina mbumba ya Yinti ya Luzingu, yina vwandaka na nsaba ya Éden, kele Klisto. Na nzila ya kento me kwiza lufwa; na nzila ya Bakala, na ngidikulu ya ntete, me kwiza Luzingu. Kuvwanda ya kubutama na kento kele lufwa; kuvwanda ya kubutama na Klisto kele Luzingu. Beno ke na

kuzwa dibanza? Ya kele kisika. Ntangu yayi beno me mona kisika banzambi ya bakento kwendaka, ve?

219 Adam mpe Ève ya ntete fwanikisaka Adam mpe Ève ya zole, beno me mona, kufuluka. Ntangu yayi kufuluka ya Adam mpe Ève vwandaka na nzila ya sexe, samu na kufulusa dyaka ntoto, kasi ya vwandaka ve mutindu yina na mbandukulu. Nzambi salaka kaka bakala mpe kento, mutindu Yandi salaka bivangu ya Yandi yankaka, beno me mona, ya kulunga, kaka mutindu Dibuundu.

220 Ntangu yayi ti beto, na kutala bakusiamisa yayi ya Butsyelika ya Nzambi, beto kutala mwa ntama dyaka, kana beno zola. [Dibuundu me tuba, “Amen.”—Mu.] Mbote mingi. Ntangu yayi yayi lendaka nyongisa kaka mwa fyoti tii beto ke kuma na yisi ya yawu, kasi mu ke lakisa beno kaka Kieleka ya yawu.

221 Ya kele ve na longi yina lenda kwela mufwidi ya kento. Beno zaba yawu? Beno zola kutanga yawu? Mbote mingi, beno baka ba-Lévitique, Lévitique 21:7 mpe Ézéchiél 44:22, mpe Yawu ke lakisa beno ti kimvuka ya banganga-Nzambi ya longo zolaka kwela ve kento yina bakala kusimbaka. Kifwanukusu yayi kele ya Kento ya dikwela ya mwense ya Yesu Klisto, samu ti ba vwanda sadilaka Tiya ya Nzambi, banganga-Nzambi vwandaka sala, bana ya babakala ya Aaron. Beto kele na ntangu mingi ve samu na kutanga Yawu nyonso, mpe kubasika ntete midi, beto kele dyaka na baminuti makumi zole. Mpe bawu kele bana ya babakala ya Aaron yina vwandaka sadila Tiya ya Nzambi, na yawu ba zolaka kwela ve kento yina bakala yankaka kusimbaka. Nzambi yina ke sobaka ve tubaka mutindu yina. Ba zolaka kwela ve kento yankaka, mpe kento yina bakala kusimbaka, na kulakisaka na kifwanukusu awa, kana beno zola kumona yawu, ti Dibuundu ya Nzambi ya moyo kele Ndinga ya Nzambi ya kuvedila, yina ba me vukisa ve, na kima yankaka, mpe dénomination ve yina muntu vwandaka me sadila.

222 Beno simba, ti beto tanga yayi awa. Mu zola beno kubakula yayi. Matthieu 5, Yesu zonzaka awa na kima yina kele kieleka ya mfunu mingi. Beto zola kumona yawu, Matthieu 5. Mu sonikaka na . . .

223 Mu sonikaka mwa bima mu zolaka tuba kaka na babakala, na yawu ya me vwanda ve mpasi ve na na kutuba yawu kaka na ntuala ya bampangi ya beto ya bakento. Kasi mu zola ku—kubasika awa ntangu ntete. . .

224 Ntangu yayi, mpangi ya kento, mu zola kutula beno na kisika kisika Ndinga ya Nzambi kusilaka beno, mpe beno ke mona na yina beno vwnda na kisika yina, mpe.

225 Matthieu 5:32. Mu zola beno kutala awa, samu na kusimba dibanza mosi yayi ya “mosi” mpe ya “mingi.” Matthieu, makumi tatu-. . . Mu banza ti ya kele Matthieu 5:32, beto banda na na 31.

Ba tubaka, Muntu nyonso yina ke katula kento ya yandi na makwela, ti yandi pesa yandi mukanda ya kufwa makwela:

226 Ya kele Yesu yina ke na kuzonzila, Yandi tubaka, “katuka mbandukulu.” Ntangu yayi beno tala mbote.

Kasi mu ke tuba na beno, Ti muntu nyonso yina ke katula kento ya yandi na makwela, kana ve. . . na dyambu ya bizumba, ke sala yandi kusala kinsuza; . . . (beno me mona) muntu nyonso yina ke katula kento ya yandi na makwela, kana ve. . . na dyambu ya bizumba, ke sala yandi kusala kinsuza: (Samu na yinki? Kento ke kwela dyaka.) mpe muntu nyonso yina ke kwelana na kento yina kele ya kufwa makwela ke sala kinsuza.

227 Beno me mona, yandi kele na bakala yina kele moyo, na yawu ata bakala ve lenda kwela yandi. Ata nyonso yina yandi ke salaka mpe nani yandi kele, yandi kele na bakala yina kele moyo, ya kele na ata fyoti ya mambu yankaka ya kutuba ve samu na yandi. Kasi, ya kele ve, samu na bakala. “Ke sala yandi,” bakala ve. Beno ke na kubakula yawu? Beno fwana sala Ndinga kutambula na kulandila. Beno me mona, kima ve ke tuba ti bakala lenda ve, kasi kento lenda ve. Beno me mona, “ke sala yandi,” bakala ve. Ya kele kaka yina Biblia ke tuba, “ke sala yandi.” Ya kele ya kutuba ve ti bakala lenda ve kukwelana dyaka, kasi “kento.” Samu na yinki? Klisto na kifwanukusu.

228 Beno tala, ya kele ya kutuba ti bakala lenda dyaka ve kukwelana, kana kaka mwense. Bakala lenda kukwelana dyaka. Yandi lenda ku-. . . yandi lenda kukwela dyaka kana ya kele mwense, kasi yandi lenda ve kukwela kento ya muntu yankaka. Kieleka ve. Mpe kana yandi kukwelana na kento ya kufwa makwela, yandi ke na kuzinga na kinsuza, mu ke kipe ve nani yandi kele. Biblia ke tuba, “Muntu nyonso yina ke kwela kento yina ba me katula na makwela, yandi ke na kuzinga na kinsuza.” Beno bawu yayi, ba ya kufwa makwela ve.

229 Beno me mona yina vwandaka ya ntete kuna, “katuka mbandukulu,” na ntangu yayi? Kukwelana dyaka, ntangu yayi beno tala, bakala lenda, kasi kento ve. Mutindu David, mutindu Salomon, mutindu kulandila ya Biblia ya muvimba, ntangu yayi, mutindu mosi David mpe bawu nyonso yankaka.

230 Ntangu yayi beno tala na ya Ntete ya Corinthiens 7:10, beno tala, Paul tumaka na kento yina kele, yina me fwa makwela na bakala ya yandi, na kuvwanda yandi mosi to kuwisana dyaka, kukwelana dyaka ve. Yandi fwana kuvwanda yandi mosi, to kuvutula ngwisani dyaka na bakala ya yandi. Kento lenda ve kukwelana dyaka. Yandi fwana kuvwanda yandi mosi, kasi, beno tala, yandi tubaka ata mbala mosi ve na bakala. Beno me mona, beno lenda ve kusala Ndinga ya luvunu. “Katuka mbandukulu,” musiku ya kuvukisa banzutu na nzila ya makwela ya bakala

mosi na nkonga ya bakento. Ntangu yayi, Ndinga ya Nzambi ke tambulaka na butsyelika na nkadulu ya Nzambi, ke tambulaka na kulandila.

²³¹ Beno me mona mutindu ya kele na lukolo mosi me kwenda na esete, mpe yankaka yina kukwenda na wesete, na zulu ya yawu? Beno fwana vutuka na Kieleka, na kutala yinki ya kele.

²³² Ya ke vwandaka ntangu nyonso mutindu yina, ya kele ngwisani ya kulunga na Nzambi katuka mbandukulu. *Ya ntete*, ntete mbandukulu, katuka mbandukulu ya vwandaka kaka na mosi mpe mosi. *Na manima* disumu me kota, kuna ya vwandaka bakala mosi mpe nkonga ya bakento; ya vwandaka tambula mutindu yina na yinza, na konso kibulu, mpe bantu ya moyo mpe nsuni ya yinza kele niama. Beto kele na dikanda ya bibulu yina ke nwise bana na nzila ya dibebe, beto zaba yawu, beto nyonso, beno me mona, mpe ya kele nkadulu nyonso ya Nzambi na kulandila.

²³³ Kasi ntangu yayi yina Bidimbu me zibuka, Mpeve ya Kieleka ke na kutwadisa beto na Ndinga. Ya ke na kubangula samu na yinki bafoti nyonso yayi me vwanda nzila nyonso ya bansungi, samu ti Bidimbu vwandaka ve ya kufunguka, Yayi vwandaka ve ya kumonikisa. Ya kele kieleka.

²³⁴ Beno tala, beno, beno lenda ve kusala bivudi kubwa. Mutindu mu longaka na beno mazono na nkokila na zulu ya kinsinsya ke talanaka na ntoto, ya fwana basika kieleka. Wapi mutindu ya lenda vwanda na kinsinsya ya nzawu kotalana na ntoto, mpe ti ya vwanda mwa muntu mosi ya fyoti, ya nzutu fyoti kubasika na kuvwanda nzawu, to nzawu na mwa muntu, ya nzutu ya fyoti?

²³⁵ Ntangu yayi kana beno ke tala yawu na kifwanukusu ya yawu ya kulunga.

²³⁶ Ntangu yayi, ya kele na kento ya kieleka, kento ya kieleka, mwense, yina ke kwelana na bakala ya yandi, mpe ke zinga, mpe yandi kele kima ya kusakumuna samu na bakala yina. Kana Nzambi lendaka na kupesa na mwana ya Yandi ya bakala kima ya kulutula mbote kento, Yandi zolaka pesa yawu na yandi.

²³⁷ Kasi ba salaka kento na kuvwanda ya ksalu ya kuvukisa banzutu, mpe ata kibulu yankaka ve ba salaka mutindu yina. Ata kivangu yankaka ve na zulu ya ntoto ba salaka mutindu yina. Ya kele samu na yina beno ke mona makwela ya bakala mosi na nkonga ya bakento, samu na yina. Ya kele yina kotisaka yawu.

²³⁸ Ntangu yayi beno tala, na analyse ya nsuka, beno tala, ya kele na Yesu Klisto mosi (ya kieleka?), Muntu mosi, Nzambi, Emmanuel. Beno ke kwikila yawu? Kasi binama ya Kento ya Yandi kele mingi, beno me mona, mafunda na bambala ya mafunda ya mafunda (ya kieleka?) Kento ya Yandi, Kento ya makwela, Dibuundu. Beno me bakula ntangu yayi?

²³⁹ Ya kele samu na yinki Yandi tubaka na Adam, ntete ba nata to ba kotisa kuvukisa banzutu, “Beno fuluka, samu na kubuta bana mingi na ntoto,” ntangu bakala vwandaka ntete na mbandukulu, ntangu yandi vwandaka ntete bawu zole bakala mpe kento na yandi mosi. Kuna, ya ke lakisa kuna ti Kento ya makwela fwana katuka na Ndinga, na nzila ya kifuluka ya kimpeve, bakifuluka, beno me mona, kubutaka bana mingi na ntoto.

²⁴⁰ Ntangu yayi na ksalu ya kuvukisa banzutu, beno me mona, balukolo kele na bima yango zole ya kuvukana. Na yawu beno lenda ve kusala yawu, beno fwana vutula yawu na Kieleka ya yawu, “na mbandukulu.”

²⁴¹ Mpe na nsuka ya ke vwanda na Mfumu Yesu mosi, mpe Kento ya Yandi ya makwela mingi, na mosi. Beno me bakula yawu? Ya vwandaka na David mosi na kiti ya kimfumu mosi, ntinu mosi (landila ntima ya Yandi mosi Nzambi) na bakento bankama tanu. Yesu ke vwanda na zulu ya Kiti ya kimfumu ya Yandi (Alleluia!) na Millénium, na Kento; mutindu ya vwandaka na mbandukulu, ya kuvanga na ntoto, na diboko ya Nzambi ya Ngolo nyonso, na mvumbukulu, ya binama mingi. Beno bawu yayi.

²⁴² Bakento, beno sala ngolo na kuvwanda yina, beno kota na Klisto, kuna beno ke vwanda ve na kati ya muvusu ya mvindu yina kuna. Kasi ntangu nyonso yina beno kele kaka mambele ya dibuundu yina ke na kumeka na kuzinga nkadulu ya buzitu mpe mbote, beno mosi, ata mbala mosi ve ti beno ke lenda yawu. Muntu mpe ve lenda yawu na ngaanda ya Klisto. Mutindu Paul kulandilaka na kutuba, “Kasi kuna, na kati ya Klisto, ya kele dyaka ve na bakala to kento.” Bawu nyonso kele mosi.

²⁴³ Kasi samu na kuzwa *Makwela Mpe Kufwa Makwela yayi* na mutindu ya kusungama, samu ti beno kuzaba yinki vwandaka mbote mpe yina vwandaka mbote ve, ntangu yayi Yandi me lakisa pwelele awa na bifwanukusu yayi. Ya kele na Klisto mosi, mpe binama mingi ya Kento yango. Beno tala, Yandi lenda katula beto na makwela samu na bizumba ya kimpeve mpe malongi ya luvunu, ntangu nyonso yina Yandi zola; kasi wapi mutindu beno lenda meka na kukatula Yandi na makwela, mpe kubanza ti beno ke lenda yawu? Bakala lenda katula kento ya yandi na makwela mpe kukwela yankaka; kasi ve kento kukatula bakala ya yandi na makwela mpe kukwela yankaka. Beno me mona bivudi nyonso mpe bifwanukusu kuna kutelama mutindu mosi mbote-mbote? Beno me mona ngidikulu ya ntete; ve kima na nzila ya kima ata kisika. Dibundu ve; Kento ya dikwela na nzila ya Ndinga. Kento ve; bakala, ntangu nyonso. Ya kele samu na yinki ba tubaka ata mbala mosi ve kima na kutelemina bakala na kusalaka yawu; ya kele ntangu nyonso kento. Ya kele kieleka.

²⁴⁴ Kasi yandi lenda vwanda Kento ya makwela ya Klisto, na kuvwandaka . . . Mpe beno bambuka moyo, yandi kele kitini ya

bakala, Biblia ke tuba yandi lenda ka- . . . “Ntangu nyonso mu me pesa ve kento muswa ya kulonga, to na kuzwa lutumu, kasi kuvwanda swi. Samu ti Adam vwandaka yina ya ntete ba salaka, mpe na manima Ève. Mpe Adam kuvunamaka ve, kasi kima na nzila ya kima kuvunamaka. Kasi yandi ke vulusa *kana* yandi landila na kuzinga na bulongo mpe na kuvwandaka swi, mpe na kubuta bana, mpe nyonso ya mutindu,” samu ti kuna yandi me kuma kitini ya bakala yayi. Ya kele yina ke nata . . .

²⁴⁵ Samu na yinki ve Abraham. . . Samu na yinki Nzambi kufwaka ve kaka Sarah ya kuvwanda kuna, yina vwandaka ndima ve, mpe yina vwandaka vuna kaka na ntwala ya Nzambi? Yandi vwandaka ya kuvwanda kuna mutindu Muntu yina ke kufwa, vwanda kudya dimpa, vwanda kunwa miliki, mpe Yandi tubaka, “Samu na yinki Sarah me seka kuna na manima,” na manima ya Yandi, na kati ya tenta, Yandi monaka yandi ve, “tubaka yayi, ‘Wapi mutindu bima yayi lenda kuvwanda?’”

²⁴⁶ Yandi tubaka, “Mu me tuba yawu ve!” Oh, ooh, la la! Kutuba na Nzambi ti Yandi kele muntu ya luvunu, na ntwala ya Yandi? Kasi Yandi lendaka ve na kubaka yandi. Samu na yinki? Yandi kele kitini ya Abraham. Amen. Yandi zolaka nyongisa yandi ve kukondwa kunyongisa Abraham.

²⁴⁷ Ntangu yayi beno bakento beno mona kisika beno fwana vwanda. Mpe Biblia ke tuba, “Beni bakento beno vwanda mutindu Sarah vwandaka, yina vwandaka na mvwatulu ya kulunga, yina vwanda zinga ya kusungama mpe ya kukwikama na bakala ya yandi, na kuzolaka yandi mingi ti yandi . . . yandi vwanda bokila yandi ‘mfumu ya yandi,’” ntwadisi, propriété.

²⁴⁸ Mpe beno, bakento yankaka, ke lwata bilele yayi ya yimbi mpe ke basika na ngaanda awa na kutalana mutindu yina na ntwala ya babakala. Yesu tubaka, “Muntu nyonso yina ke tala kento samu na kulula yandi me sala yimeni pité na yandi na kati ya ntima ya yandi.” Na manima nani kele muntu kufwaka musiku, bakala to nge? Yandi kele bakala, yandi kele ya kusala mutindu yina uyandi lenda baka kusalu yayi, beno me mona; mpe beno kele kento, yina fwana manga.

²⁴⁹ Mpe samu na yinki beno ke tula beno mosi na ngaanda mutindu yina? Ya kele ve samu na kupesa beno kikesa, beno zaba ti ya lenda vwanda ve, ntangu beno kele ya kulwata ndambu ya kufwa na madidi na bakupe ya beno. Beno me mona, ya lenda vwanda ve samu na kupesa beno kikesa. Na yina yinki ya kele? Ya kele samu na kutsema ve! Beno ke ndima yawu ve, kasi ya kele Biblia me tuba yawu. Ya kele Kieleka. Ya kele mpeve ya mvindu yina kele na kati ya beno. Beno zola ve kuvwanda mvindu; kasi beno ke na kubakula ve, na kimpeve beno kele ya mvindu, samu ti beno ke na kumonisa beno mosi ya mvindu.

²⁵⁰ Ntangu yayi, bakala, na makoto ya yandi, ya bununu, ya mvindu na makwata, mpe kana na kutala yandi lwata ve bilele,

ya ke sala ve luswaswanu mosi, nzutu ya yandi ke meka ve. Samu na yinki? Yandi vwandaka na ngidikulu ya ntete, kikalulu; ya zolaka vwanda, beno me mona. Kasi, beno kele kima na nzila ya kima, samu na kumeka.

²⁵¹ Nzambi, vwanda na kyadi! Oh, la la, yinza ya masumu yayi! Mu ke na kyese ntangu ya ke suka.

²⁵² Beno tala, Yandi lenda katula kento ya Yandi ntangu nyonso Yandi zola na makwela, kasi kento lenda ve kukatula Yandi na makwela; Yandi lenda sala munu, Yandi lenda losa munu na ntoto ntangu nyonso yina Yandi zola, kasi, oh, mpangi, mu ke sala mbote na kumeka ata mbala mosi ve na kulosa Yandi kuna, ya munu yimeni.

²⁵³ Salomon zolaka kwela kento nyonso yina vwandaka ve ya kukwela, yandi zolaka kwela kento nyonso yina yandi zolaka. Nganga-Nzambi zolaka kwela kaka kento yina vwandaka mwense. Salomon . . .

²⁵⁴ Mutindu David, yandi kwelaka (yinki vwandaka nkumbu ya yandi?) Abigail. Yina, ya vwandaka na bakala mosi ba vwanda bokilaka “kilawu,” yandi vwandaka na kento mosi ya mbote, mpe yandi kufwaka. Mpe Abigail kukwelanaka na David; yandi vwandaka ntinu, nganga-Nzambi ve, beno me mona, na yawu yandi—yandi kwelanaka.

²⁵⁵ Kasi nganga-Nzambi zolaka sala yawu ve, samu ti yandi simbaka to kuzwa kento na kuvwanda kento ya yandi yina vwandaka yimeni kento ya bakala mosi. Na yawu yina ke lakisa bumwense ya Dibuundu ya Mfumu Yesu Klisto, Kento ya dikwela fwana vwanda yina ba me vukisa na kima yankaka ve, Ndinga, ata Ndinga mosi ve kukondwa ata kisika. Kieleka. Beno lenda banza na kento ya makwela ya kulunga, ya kukondwa dibene mosi, mpe, yankaka yina, kima yankaka ya mbote ve, beno zaba? Ya ke vwanda ve Kento ya dikwela ya Klisto. Yandi kele ya kulunga. Yandi kele nyonso Ndinga, Ndinga mosi ve ke kondwa kisika. Ve.

²⁵⁶ Beno tala, Yandi lenda katula yandi na makwela, kasi yandi lenda ve kukatula Yandi na makwela. Yandi salaka yawu, lakisaka yawu, na bilumbu na ntangu ya Luther, Wesley, mpe ya Pantekote, ntangu ba mangaka na kukuma kitini ya kukwenda na ntuala ya Yandi na nzila ya kuzwa dyambu ya kuvukisa banzutu samu na kukuma na kivumu na kiti ya kukwenda ntama ya Ndinga. Beno me bakula? Yandi mangaka. Dibuundu ya Luther kumangaka ti Klisto kuzola dyaka yandi; Luther mangaka yawu. Mpe bika mu tuba yayi, beno ke bokila munu kima mosi na mutindu nyonso; mutindu mosi ya kele bubu yayi na konso mosi ya bawu, ba me kondwa na kubaka Ndinga yango, ba me manga Klisto!

²⁵⁷ Mpe kento nyonso yina ke manga na kupesa mwana na bakala, kele na muswa ve ya kuvwanda kento ya yandi. Amen.

Beno me bambuka moyo, na kati ya Biblia, ntangu ntinu kwelaka Esther? Samu ti ntinu ya kento kumangaka, yandi kuzwaka kaka yankaka. Mpe ntangu . . . Yinki kusalamaka ntangu yandi mangaka na kubasika na ntinu mpe kutumama na yandi? Kima mosi ya kele na kento yina ke manga na kuvwanda kento na bakala ya yandi.

²⁵⁸ Mpe mutindu mosi ya kele na dibuundu yina ke manga na kukuma na kivumu na nsungi yina beto ntangu yayi ke na kuzingaka, samu na kubuta bana ya mbandu yayi. Beto kele ve bantu ya Luther, beto kele ve bantu ya Wesley, beto kele mpe dyaka ve bantu ya Pantekote! Beto fwana vwanda bana ya nsungi yayi, na nzila ya kivumu ya Ndinga ya Nzambi, samu na kubuta Mwana ya mbandu yayi, Nkuna Mwana. Amen. Mu banza ti beno ke na kubakula. Zolaka ve na kuzwa kivumu, ve, na yawu yinki Yandi salaka? Yandi katulaka yandi na makwela, na kufwaka makwela. Ya kele kieleka. Kasi kento kumeka ve na kukatula Yandi na makwela. Bakala katulaka yandi na makwela.

²⁵⁹ Yandi landilaka kaka na kumonikisaka Ndinga ya Yandi na Nzutu, mpe kusiamisaka Yandi, mutindu mosi, na nzila ya Yandi mosi. Bana ya Yandi kubandaka na kutalana mutindu mingi mutindu Yandi, samu ti Yawu yelaka mingi, to, ba kumaka bana ya Ndinga, bana ya dibuundu ve. Bana ya Ndinga! Mpe Kento ya makwela ke vwanda mwa Mama ya luzolo ya Ndinga, yina ba me vukisa na kima yankaka ve, ya kusimba ve na nzila ya organisation nyonso ya muntu, na nzila ya mayela nyonso yina muntu me sala. Yandi ke vwanda nyonso ya kuvedila yina ba me vukisa na kima yankaka ve, Kento ya makwela ya Ndinga! Amen mpe amen! Mu banza ti beno me bakula yawu, beno na singa ya alo-alo kuna. Yandi ke vwanda mwana ya kento ya Nzambi na kivumu.

²⁶⁰ Beno me mona na wapi lukumu ya nene kento lenda vwanda? Beno me mona wapi kima ya nene dibuundu lenda vwanda, kasi beno ke mona kisika kutysema ve me nata yandi? Na yina beno meka kufwanikisa dibuundu yango na ngaanda kuna na Dibuundu awa, beno lenda ve kusala yawu. Mpe beno meka na kufwanikisa na kento ya kindumba ya bala-bala na Dibuundu ya Nzambi ya moyo; to kento, kento ya kulunga, na kento ya kindumba?

²⁶¹ Samu na yinki ya kele na bima mutindu yina? Ya kele musiku ya Nzambi, musiku ya baluswaswanu. Wapi mutindu beto ke zaba mutindu ya kusepela nsemo ya kilumbu kana ya vwandaka ve na mpimpa? Wapi mutindu beto ke zaba mutindu ya kuyangalala na ntangu ya kuyuma kana ya vwandaka ve na mvula? Wapi mutindu beto zolaka zaba na kuyangalala mpe kuzitisa kento ya kieleka, kana ya vwandaka ve na mosi ya mvindu?

262 Yandi landilaka na kumonisa Yawu pwelele, na kumonisaka pwelele Ndinga ya Yandi, kasi keba na mosi ya beto yina ke meka na kukatula Yandi na makwela mpe kukwela yankaka.

263 Ntangu yayi kieleka ti ya ke talana pwelele samu na yinki mabanza nyonso zole kele mbote ve. Beno lenda ve kusala yawu kutambula mutindu *yayi*, yimeni; beno kusala yawu kutambula mutindu *yina*, ya ke tambula na kulutaka nsilulu. *Awa* kele nsilulu, awa kele kima kaka awa. Ndinga ke salaka ntembe ve. Yawu fwana vwanda na kulandila ntangu nyonso, ata mbala mosi ve ti Matthieu 28:19 ke tula ntembe na Actes 2:38.

264 Ntangu yayi, ndambu ya beno bakento, ndambu ya beno babakala, mu—mu zaba ti beno kele—beno ke wisana na Yawu ve. Samu ti, beno zaba, beno lenda ve kubumba yawu malu-malu yayi. Beno lenda ve.

265 Kasi beno bika munu kulakisa beno kima mosi. Kana Matthieu 28:19 me tuba, “Na yawu beno kwenda, longi bayinsi nyonso, na kubotikaka bawu na Nkumbu ya Tata, mpe ya Mwana, mpe ya Mpeve-Santu,” mpe na manima, mpe muntu nyonso yina kuzwaka ntete mbotika vwandaka ya kubotama na mutindu yankaka na yina, kubotamaka na Nkumbu ya Yesu Klisto, nzila nyonso ya nsungi ya Biblia mpe bamvula bankama tatu na manima ya nsungi ya Biblia, tii Concile ya Nicée. Kuna na kisika ba ndimaka ba-dogme. Wapi luswaswanu, kana ya kele ve ya kumonisamaka pwelele?

266 Mpe beno zaba ti Buku ya muvimba, Biblia ya muvimba, kele luzayikisu? Ya kele mutindu beno fwana zaba kielka na kati-kati ya yandi yayi mpe yankaka, ya kele samu ti Yawu kele luzayikisu. Mpe luzayikisu fwana vwanda kaka na Ndinga, ya kuswaswana ve na Ndinga. Beno ke tuba, “Mbote, mu, ya kumonisamaka pwelele na munu.” Kuna kana ya kele ya kuswaswana na Ndinga, ata mbala mosi ve ti ya me katuka na Nzambi. Ya kele kieleka.

267 Ntangu yayi kana beno zola kubaka Mat- . . . Matthieu 16:18. Yesu tubaka, Yandi mosi, ti Dibuundu ya muvimba, Dibuundu ya Yandi, ke tungama na zulu ya luzayikisu ya kimpeve ya Yandi mosi, yina kele Ndinga. “Mu ke tuba na nge, ti nge kele Pierre. . . Mpe ti nsuni ve mpe menga me monikisa yayi na nge, kasi Tata ya Munu yina kele na Mazulu me monikisa yayi na nge. Mpe na zulu ya ditadi yayi. . .”

268 Ntangu yayi, mu zaba ti, bankundi ya beto ya Katolika kuna, beno ke tuba, “Ya kutungamaka na zulu ya Pierre, mpe Pierre ya ntumwa, na yawu, *Kingandi*, na kumanga ve, na ndandani ya bantumwa.”

Ba-Protestant ke tuba, “Ya kutungamaka na zulu ya Yesu Klisto.”

269 Ve samu na kuvwanda ya kuswaswana, kasi beno baka kaka yina Yandi tubaka! Yandi tubaka, “Nsuni mpe menga ve me

monikisa yayi na nge, kasi Tata ya Munu yina kele na Mazulu me monikisa yayi na nge. Mpe na zulu ya ditadi yayi” (luzayikisu ya kimpeve ya yina Ndinga kele) “Mu ke tunga Dibuundu ya Munu; mpe bankotolo ya difelo ata mbala mosi ve ke bwisisa Yawu.” Kento ya Yandi ke vwanda ya kumekama ve na babakala yankaka. “Mu ke tunga Dibuundu ya Munu, mpe bankotolo ya difelo ke lenda ata mbala mosi ve kuningisa Yawu.”

²⁷⁰ Mpe Abel mpe Cain, na nsaba ya Éden. Cain kusalaka dibanza ya yandi mosi, yandi tubaka, “Ntangu yayi, beno tala, Nzambi kele Nzambi ya mbote. Yandi kele na zulu ya yinza nyonso, na yawu mu ke kuzwa madeso mpe bambala, mpe mu ke kuzwa bafololo, mpe mu ke salila Yandi autel ya kitoko mingi.” Yina kele dibuundu. Yandi kufukamaka. Yandi kwikilaka Nzambi. Yandi kusambilaka Nzambi, nangulaka maboko ya yandi, mpe pesaka munkayulu yayi. Yandi salaka nyonso ya muntu ya bisambu yina Abel kusalaka.

²⁷¹ Abel kutungaka mutindu mosi ya autel. Kasi ntangu Abel kunataka ya yandi, yandi nataka mwana dimeme. Ntangu yayi, Cain vwandaka banza ti, na kusalaka nkisi samu na disumu, ti tata mpe mama ya yandi zolaka kudya mbuma, mutindu ba longaka bawu na nsaba yango. Kasi Abel, na nzila ya luzayikisu ya Kinzambi, zabaka ti ya vwandaka menga yina salaka yawu. Na nzila ya luzayikisu ya Kinzambi! Mpe Biblia ke tuba na Hébreux, kapu 12, kapu 11, ti, “Abel, na nzila ya lukwikilu,” (luzayikisu) “pesaka na Nzambi munkayulu ya kulutila na Cain, na yina Nzambi pesaka kimbangi ti yandi vwandaka ya kusungama.” Ya kele kieleka? Amen! Mpangi ya bakala, mpangi ya kento, ya kele pwelele mutindu kima nyonso lendaka vwanda, samu na munu. Kima ya muvimba yawu yayi.

²⁷² Ntangu yayi na zulu ya *Makwela Mpe Kufwa Makwela*, beno me mona, ya fwana kumonisama pwelele. Ntangu nyonso yina ya ke monisama pwelele ve, beno ke zaba yawu ve. Kasi Yandi silaka na bilumbu ya nsuka yayi, na mbandu yayi, ti konso kinsweki ya kubumbama na kati ya Biblia ke monisama pwelele. Bantu yikwa zaba yawu? Apocalypse, kapu 10! Yesu silaka yawu, ti mansweki nyonso yayi ya kubumbama na zulu—na zulu ya *Makwela Mpe Kufwa Makwela*, mansweki nyonso yankaka yayi yina vwandaka ya kubumbama, ke monisama pwelele na ntangu ya nsuka. Ntangu yayi beno ke bambuka moyo, Ndinga tubaka, “Kwenda na Tucson.” Beno ke bambuka moyo na Nsemu ya mansweki na mazulu? ya Wanzio ya sambwadi ya kutelama kuna? mu vutukaka, mpe Bidimbu Sambwadi kufungukaka. Beno tala mbote yinki kusalamaka. Ya kele kieleka.

²⁷³ Ntangu yayi mwa dyaka ntama mingi. Kasi ntangu yayi, beno kuwa! Mu zaba ti ya ke na kukumaka ntangu ya beno ya kudya, kasi mu ke na kudyaka kaka mbote.

274 Beno tala, ntangu yayi, kento me kuzwa kisika ya yandi, mpe yandi kele musanga ya ntalu. Salomon, bakala yayi yina kuzwaka bakento mafunda kumi. . . to na kisika, kuzwaka bakento funda, yandi tubaka ti, “Bakala yina me kuzwa kento, me kuzwa kima ya mbote.” Yandi tubaka, “Kento ya mbote kele musanga ya ntalu na yimpu ya nkembo ya yandi,” ya kele lukumu. “Kasi ya kusungama ve kele maza na kati ya menga ya yandi,” yina kele luzingu ya yandi. Yandi tubaka, “Ba lenda tala bakala mosi ya kusungama na kati ya funda,” Salomon tubaka yayi, “kasi,” yandi tubaka, “beno ke mona ve kento mosi ya kusungama na kati ya funda.” Salomon tubaka yawu, beno me mona. Ntangu yayi beno tala ti, ti mutindu ya kele.

275 Kasi, beno me mona, kento, beno kele—beno kele musanga ya ntalu kana beno zola kuvwanda musanga ya ntalu, kasi nsatu fwana katuka na beno. Mpe beno me mona samu na yinki *Makwela Mpe Kufwa Makwela* vwandaka, ti Yesu lakisaka bawu na kuvutuka, ya vwandaka samu ti mbandu ya beno vwandaka dyambu ya disumu nyonso. Ya kele samu na yina, ba kotisaka makwela ya bakala mosi na nkonga ya bakento mpe kufwa makwela, mpe bima. Na mbandukulu ya vwandaka ve mutindu yina, mpe ya ke vwanda ve mutindu yina na yinza yankaka kuna.

276 Beno tala Jacob, na nzila ya yina kwizaka batata. Yandi vwandaka na lutangu ya fyoti bakento kumi na zole. Yandi kwelaka bampangi zole ya bakento, mpe kuzwaka makangu ya bakento na lweka yankaka, makangu ya bakento yina luyalu kuzabaka yina vwanda zinga na yandi. Mpe batata yango kubutamaka kaka na nzila ya bakento yango ya makangu. Ya kele kieleka? Beno me mona, beno fwana kusala Ndinga kutambula mbote.

277 Oh, mu kele na ba-page na zulu ya yawu. Kana kisyelo mosi kuyufula munu na zulu ya yawu, mpe ti beto kukutana, beto ke zonzila na yawu. Kasi na butsyelika, kana yandi kele na mwa kimpeve fyoti, yandi lenda mona kaka awa ti ya kele Kieleka. Ya kele ve na kyuvu na Yawu.

278 Kento ya mbote kele kima ya mbote. Mu zaba yawu. Mu zaba yawu na nzila ya bakento ya kieleka. Mu me kutanaka na bakento ya kieleka yina kele kieleka, kaka kieleka mutindu muntu nyonso me tambulaka ntete.

279 Yandi kele kima na nzila ya kima mpe ndambu ya yandi, mpe na ntangu ya kubwa yandi kuwaka yandi. Yandi kaka. . . Yandi kele kitini ya yandi. Kasi, ya me tala yandi, ba salaka yandi mutindu yina samu yandi vwanda ya kutsyema ve, mpe ba pesaka yandi muswa ya kumanga to kundima. Ya kele ya kuswaswana na yinza ya ntete na mbandukulu, beno me mona, kasi beno bawu yayi.

280 Ntangu yayi ya me kuma midi, na yawu mu ke luta kaka na malembe na kima awa baminuti fyoti. Mu zola kuyufula beno kima mosi.

281 Ntangu yayi, beno bambuka moyo, mu ke tuba yayi kaka na nkonga ya munu kaka. Mpe na bayina kele na singa ya alo-alo, mu ke na kutuba yayi na bilandi kaka ya munu mosi. Nsangu yayi kele kaka samu na bawu, mpe yina mu ke tuba awa.

282 Mulongi nyonso, yandi, ya kele ya yandi, inga, yandi kele mvungi ya mameme, bika yandi sala nyonso yina yandi zola. Ya me tala yandi mpe Nzambi. Nganga-Nzambi nyonso, mulongi nyonso, ya me tala beno, mpangi ya munu.

283 Mu ke na kuzonzaka awa na Jeffersonville, kisika kaka mu lenda zonza yayi, ya kele samu ti ya kele mameme ya munu mosi. Ya kele mameme yina Mpeve-Santu pesaka munu na kukeba, mpe Ya kele na zulu ya yintu ya munu. Mpe bantu ya munu yayi kundimaka awa bisika nyonso na yinsi, bayina mu me nata na Klisto. Mpe, bana ya fyoti, mu kele awa samu na kusadisa beno, mpe mu kele nkundi ya beno. Beno lenda banza ti mu me zonza na kuteleminaka beno; mu ke na kutuba yayi, beno me mona, samu na mbote ya beno. Mu zola beno. Mpe kana ya kele mutindu yina ve, Nzambi kele Zuzi ya munu. Beno zaba ti mu zola beno.

284 Yayi kele kima ya boma ya ngolo, mu vwanda zaba ve mutindu ya kusamuna yawu. Yinki mu ke sala, ntangu mu kele na babakala mpe bakento ya kuvwanda na kati ya dibuundu ya munu, bayankaka ya bawu me kwelana bambala zole to tatu? Babakala ya mbote mpe bakento ya mbote, nyonso ya kuvukana! Yinki salaka yawu? Malongi ya luvunu, tsyelika, na kuingilaka ve na Mfumu.

285 “Yina Nzambi me vukisa, ti muntu ve kukabula.” Yina muntu me vukisa ve; yina “Nzambi” me vukisa! Ntangu beno me kuzwa luzayikisu ya mbala mosi na Nzambi, ti ya kele kento ya nge, mpe kima mutindu mosi, ya kele ya beno, luzingu ya beno nyonso. Beno me mona? Kasi yina muntu me vukisa, muntu nyonso lenda kabula. Kasi yina Nzambi me vukisa, ti muntu ve kumeka na kusimba yawu. “Yina Nzambi me vukisa,” Yandi tubaka, “ti muntu ve kukabula.” Ve yina mufundisi mosi ya ndambu ya kukola to yina kima yankaka me vukisa, to mulongi mosi ya retrograde na kikunku ya ba-credo na buku, yina ke bika bawu kusala nyonso na yinza, mpe Ndinga ya Nzambi kele kaka kuna. Beno me mona? Mu ke na kuzonzila na yina Nzambi me vukisa.

286 Ntangu yayi mu ke tuba yayi na beno. Mu ke na kusala mingi keba na yina mu ke na kutuba na beno. Mu zola ve kuvwanda ngolo na bantu. Mu zola ve kuvwanda ngolo na beno, bampangi ya munu ba-pasteur. Mu zola yawu ve. Kasi ya kele na zulu ya yinyu ya munu, na kuzabaka ti yayi me pesama na maboko ya munu, mpe kana. . . Mu lenda kanga Yawu ve, mpe mu zaba ve

mutindu ya kubasisa Yawu, mpe mu zaba ti bande yayi ke . . . Oh, la la, mu ke yilamaka kaka, bilo ya kufunguka, samu ti awa ya ke kwiza. Beno me mona?

²⁸⁷ Kaka mutindu ya vwandaka na zulu ya *Nkuna Ya Nyoka*, kasi kieleka ya me talisa ti ya kele kieleka. Mu ke na mikanda kaka awa, mukanda, kisika bakento malu-malu yayi . . . mpe dyaka na—na nene . . . Bayankaka ya ba-diocèse ya nene ke na bafoto ya ntete, nyoka ke na kubelumuka na zulu ya dikulu ya kento, mpe kaka na mutindu yawu ke na kubalukaka na zulu ya yandi; kento ke na kuzwa mutindu nyonso ya ba-kuningana ya nzutu mpe bima, kima yina bakala lenda ata mbala mosi ve kupesa yandi, na nyoka ya nene yayi yina ke na kubalukaka na zulu ya yandi, mpe nyonso yina. Ya kele kaka tsyelika. Mpe ya ke na kukuma ya kulutula yimbi mpe ya kulutula yimbi, mpe ke landila na kulutula yimbi. Nyoka, yina yandi vwandaka ve . . . yandi zolaka vukisa ve nzutu na kento na yina yandi vwandaka nyoka, kasi beno bambuka moyo . . .

²⁸⁸ Mu kuzwaka kimoko kilumbu yankaka yina na . . . kimoko ve, kaka na mulongi mosi ya ba-Assemblée de Dieu mpe mpangi na kisalu, Yandi tubaka, “Nge kele na foti, na zulu ya Yawu.”

Mu tubaka, “Mbote, mu lenda vwanda. Mu ke zola ti nge tuba na munu.”

²⁸⁹ Kuna yandi me tuba, yandi me landila mpe me banda na kuzonza na zulu ya yawu. Kima ya ntete beno zaba, yandi me zimbana yandi mosi. Mpe kima mosi yandi tubaka, yandi tubaka, “Mpangi Branham, wapi kisika kele mutindu yango? Nzambi tubaka, ‘mosi ya konso mutindu.’ Ntangu yayi wapi kisika kele mutindu yango yina beno tubaka vwandaka na kati-kati ya muntu mpe niama, yina luzabu ya yinza lenda ve kutala ntangu yayi? Wapi kisika yandi kele?” Yandi tubaka, “Yandi kele na zulu ya ntoto? Yandi vwandaka kimpenzi?”

²⁹⁰ “Ve, samu ti menga ya kimpenzi lenda vukana ve na kento, ata kibulu yankaka ke vukana na kento. Ve, ya lenda ve, to dyaka ve maluma ya bakala ke vukana na—na kento. Ya ke sala yawu ve.”

²⁹¹ “Na yina wapi kisika kele mwa kibulu yango? Ntangu yayi, Nzambi tubaka, ‘Ti nyonso kupesa ya mutindu ya yawu.’”

²⁹² Mu vingilaka fyoti. Mpe lembami ya Mpeve-Santu me tuba, “Tuba na yandi, ‘Ya kele awa.’”

Ntangu yayi, na ya ntete mu tubaka, “Mbote, ya lenda vwanda ya kuswaswana.”

Yandi tubaka, “Kasi, Mpangi Branham, ti, beto ke na kuzonzila na yina me tala Ndinga, mutindu yina ve?”

²⁹³ Mu tubaka, “Yinga, tata.” Mpe mu tubaka, “Bawu, ya kieleka, ke tubaka ti bima yankaka yina, mutindu ba-dinosaure mpe—mpe mammouth, mpe nyonso yankaka yina,

ba-mammifère, to ba-mammouth, na kisika, ba kele ya kuswaswana, mpe nyonso yina.” Mu tubaka, “Ya zolaka vwanda yawu.”

²⁹⁴ Yandi tubaka, “Mpangi Branham, beto ke na kuzonzila na kimbangi ya Ndinga. Kana disumu kele awa, na yina, disumu ya ntete, ya fwana vwanda awa mpe.”

²⁹⁵ Mpe mu tubaka, “Mfumu Yesu, Nge tubaka, ‘Beno vwanda na manyongo ve na yina beno ke tuba ntangu beno ke kwiza na ntwala ya muntu, samu ti ya ke pesama na beno na ngunga yina.’ Mfumu, yinki mu ke tuba?” Yandi tubaka, “Tuba na yandi, ‘Ya kele awa.’” Kaka mutindu mosi ntangu mu ke monaka ba-vision na zulu ya estrade.

²⁹⁶ Mu tubaka, “Ya kele awa,” na kuzabaka ve kisika.

Yandi tubaka, “Wapi kisika?”

Mpe ntete kwandi mu banza, Yandi tubaka, “Ya kele nyoka.”

²⁹⁷ Ya kele kaka yina ya vwandaka, samu ti yandi kele dyaka ve kibulu. Ba singaka yandi mpe ba tulaka yandi na kivumu ya yandi bilumbu ya yandi nyonso. Yandi kele awa. Ya kele kieleka? Mpe dyaka na kusalu yina yandi salaka, ya kele dyaka na bisalu mosi ya disumu na zulu ya kento, mutindu kimpene ya bakala mutindu yina. Ya kele kisika kento ke vwandaka na mitindu ya yandi ya meso ya kubaluka mpe nyonso, ntangu yandi ke vwandaka na ba-kuningana ya nzutu ya kulutila na zulu ya yina bakala nyonso lendaka pesa.

²⁹⁸ Mu ke sukisa kuna samu ti beto kele bantu mingi ya kuvukana. Mu ke vukisa babakala, mu ke . . . beto ke zonzila mingi na zulu ya yawu. Mu ke na mikanda mpe nyonso ya kuvwanda kaka awa, kaka na diboko ya munu malu-malu yayi, mpe mu vwanda zola kupesa yawu na beno na suka yayi. Mu zolaka baka kilumbu nyonso ya muvimba na yayi, kasi mu ke manisa ntangu yayi na kutubaka yayi.

²⁹⁹ Yayi kele kaka samu na dibuundu ya munu. Dibundu ya munu ve . . . Mameme ya fyoti yina ke kwikilaka na munu mpe yina ke landaka munu, yayi kele samu na bawu.

³⁰⁰ Kilumbu yankaka yina, na kuzabaka ti ntangu mu ke tubaka na beno kima mosi, ya fwana vwanda MUTINDU ME TUBA MFUMU, na yina mu vwandaka na Masonuku mutindu Yandi monikisaka yawu na munu. Kasi, “Mfumu Nzambi, yinki mu lenda tuba na dibuundu yina? Mu ke kuzwa bakukabuka. Babakala ke vwanda ya kuvwanda na velanda mpe na ngaanda ya lupangu, mpe bisika nyonso yankaka, ‘Mu fwana bika kento?’ Bakento, ‘Mu fwana bika bakala ya munu?’ ‘Yinki fwana mu sala?’” Mu tubaka, “Mfumu, yinki mu ke sala?”

³⁰¹ Kima tubaka na munu, “Kwenda kuna na zulu ya mongo, mpe Mu ke zonza na nge.”

³⁰² Mpe na yina mu vwandaka na zulu ya mongo, mu vwanda zaba ve ti na yisi na Tucson ba vwanda mona Yawu. Kasi mpe milongisi bokilaka bana na . . . mwana ya munu ya kento mpe bayankaka, na kubasika na kalasi, mpe tubaka, “Beni tala kuna na mongo! Ya kele na Dituti ya ntenta ya mbwaki mutindu tiya yina ke na kumata na zulu mpe ke na kuvutukaka na yisi, yina ke na kwenda na mupepe mpe ke na kuvutukaka na yisi.” Nkembo na Nzambi.

³⁰³ Mama Evans, nge kele awa? Ronnie, nge kele awa? Na kuvutukaka mu lutaka na station, ntwenya ya bakala yayi na station ya lusanse, na station ya lusanse ya ba-Evans kuna. Mpe ntete mu zaba yina mwana yango ya bakala zolaka tuba, yandi bakaka munu kukondwa mu zaba, yandi tubaka, “Mpangi Branham, nge vwanda na mongo na zulu kuna, mutindu yina ve?”

³⁰⁴ Mu tubaka, “Yinki nge zola kutuba, Ronnie? Ve,” beni me mona, samu na kumona yinki yandi zolaka sala. Bambala mingi ntangu bima ke salamaka, mu ve, ba ke tubaka yawu ve na bantu. Ya ke kumaka . . . Kima na yawu kele, beni ke monaka ya mingi kusalama, ya ke kumaka mutindu ya konso ntangu samu na beni. Beni me mona? Mu ke tubaka kaka ve na bantu. Mu tubaka, “Ronnie, yinki nge vwandaka . . .”

³⁰⁵ Yandi tubaka, “Mu lenda lakisa nge kaka kisika nge vwandaka.” Yandi tubaka, “Mu bokilaka mama, mpe beto vwandaka ya kutelama awa mpe vwandaka tala mboté Dituti yango ya kulelama na zulu kuna, ke na kumata mpe ke na kukulumuka. Mu tubaka, ‘Ya fwana vwanda Mpangi Branham ya kuvwanda kisika mosi kuna na zulu. Ya vwandaka Nzambi vwandaka zonza na yandi.’”

³⁰⁶ Mpe mbanza ya muvimba, bantu, talaka Yawu. Na kilumbu ya ntangu ya ngolo kisika matuti vwandaka ata fyoti ve, mpe Dituti yayi ya nene ya ntenta ya mbwaki kulelama kuna; yina vwandaka kwiza na yisi mutindu pasware, mpe vwandaka vutuka mpe vwandaka tandama.

³⁰⁷ Bankundi, mpe na manima mu ke manisa, beni lenda kwenda katuka yayi. Ya kele ntangu ba monikisaka pwelele Yayi na munu, yina mu ke tuba na beni malu-malu yayi, na yawu beni kondwa Yawu ve.

³⁰⁸ Ntangu yayi mu ke na kuzonzila kaka na bilandi ya beto, bayina ke landaka munu mpe Nsangu yayi kaka, bantu ya ngaanda ve. Beni pesa munu kimbangi ya yayi na ntuala ya Nzambi. Kaka samu na nkonga yayi kaka!

³⁰⁹ Ntangu yayi beto kele na kati ya muvusu yayi samu na nttendulu ya yimbi ya théologie. Ya kele kieleka? Ya kele samu na yina beni bakento ke kwelaka bambala zole, mpe beni babakala, samu na lutendulu ya yimbi ya théologie. Ntangu yayi mu zola kulakisa beni kima yina Yandi tubaka na munu.

³¹⁰ Mpe kana Nzambi, Kiyidiki ya beto, ba yufulaka ntangu Yandi vwandaka awa na zulu ya ntoto, Yesu Klisto; mpe ntangu profete ya Yandi yina zolaka kuula kwizaka, Moïse, kuna na Égypte, samu na kubasisa bana na—na Égypte, samu na kutula bawu na kati ya yinsi ya kusila; mpe Yesu tubaka awa ti Moïse kumonaka bantu na mutindu yayi, mpe pesaka bawu muswa ya kusonika mukanda ya kufwa makwela, samu ti dyambu vwandaka yina ya vwandaka. Moïse talaka mutindu, mutindu, “Ti yandi pesa muswa . . .” Nzambi pesaka Moïse muswa, profete yina ba fidisaka na bantu, samu na kupesa bawu mukanda yayi ya kufwa makwela.

³¹¹ Mpe na Ntete Corinthiens, na kapu 7, na nzila 12 mpe 15, na Ngwisani ya Malu-malu profete, Paul, muntu yina kukutanaka kima mosi na dibuundu, mpe zonzaka yayi, “Yayi kele munu, Mfumu ve.” Ya kieleka? Samu na mambu ya kufwa makwela.

³¹² “Ya vwandaka ve mutindu yina na mbandukulu.” Kasi ba pesaka muswa na Moïse samu na yawu, mpe Nzambi kuzabaka yawu na mutindu ya kusungama. Mpe Paul mpe kuzwaka muswa, ntangu yandi monaka dibuundu ya yandi na kati ya mutindu yina.

³¹³ Ntangu yayi beno ke kwikila ti Yayi kele kieleka, mpe mu ke kwikila ti Yawu me katuka na Nzambi! Mpe na nzila ya kusiamisama ya Dituti ya Yandi mpe Nsangu ya Yandi yina me nata munu ntama mingi, Nzambi lenda ve na zulu ya mungo kupesa munu muswa ya kusala kima ya mutindu mosi, na kupesa beno muswa ya kulandila mutindu beno kele, mpe kusala dyaka yawu ve! Beno kwenda na bakento ya beno mpe beno zinga na ngemba, samu ti ngunga me kuma ntama. Nkwizulu ya Mfumu me kuma pene-pene. Beto kele ve na ntangu ya kuzenga bima yayi. Beno meka dyaka ve na kusala yawu! Mu ke na kuzonzilaka kaka na dibuundu ya munu. Kasi kana beno kele ya kukwela . . . Mpe Nzambi pesaka munu kimbangi ya yawu, na zulu ya mungo, ti mu lenda tuba Yayi, luzayikisu ya kimpeve, samu na kuzibuka ya Bidimbu Sambwadi, mpe yayi kele kyuvu na kati ya Ndinga ya Nzambi. “Ti bawu kulandila mutindu bawu kele, mpe kusumuka mbala mosi dyaka ve!”

³¹⁴ “Ya vwandaka ve mutindu yina na mbandukulu.” Ya kele kieleka, ya vwandaka ve mutindu yina, mpe ya ke vwanda ve na nsuka. Kasi na yinsi ya mitindu ya bilumbu yayi, mutindu kisadi ya Nzambi . . . Mu ke kumibokila ve profete; kasi mu banza ti, kana mu vwandaka ve ya kufidisa samu na yina, mu ke na kuyidika ntoto samu na yandi yina ke na kwiza. Na yawu na yisi ya mitindu ya bilumbu yayi, mu ke pesa beno muswa ya kukwenda na yinzo ya beno, na kento ya beno ntangu yayi. Kana beno kele na kyese na yandi, beno zinga na yandi, beno yindula bana ya beno na kulongaka bawu landila Nzambi. Kasi Nzambi vwanda na kyadi na beno kana beno sala dyaka yawu! Beno longa bana ya beno na kusala ata mbala mosi ve kima ya

mutindu yina, beno yindula bawu na kulongaka na bawu landila Nzambi. Mpe ntangu yayi na yina ti beno kele mutindu beno kele, ti beto kwenda ntangu yayi, na ngunga ya ntama ya ntangu ya mpimpa yina beto ke na kuzingaka, mpe “beto kima mbangu na mantwala samu na lusalusu yina Klisto ke na kubokila na mazulu,” kisika bima nyonso ke salama.

³¹⁵ Tii mu ke mona beno na nkokila yayi, Mfumu Nzambi kusakumuna beno, na yina beto ke sambila.

³¹⁶ Mfumu Nzambi, beto me vutula Nge matondo. Beto me pesa Nge nkembo. Nge kele Yehowa ya nene mosi yina pesaka Moise muswa. Moise, kisadi yango, mpe yinki yandi zolaka tuba na bantu ya yandi? Mpe, Nzambi, Nge pesaka yandi muswa na kupesa mukanda ya kufwa makwela. Paul, ntumwa ya nene yina vwandaka musoniki ya Ngwisani ya Malu-malu, mutindu Moise vwandaka ya Ntama. Moise sonikaka Misiku mpe bongisaka misiku. Baprofete mingi, mambu ya bawu kubwelamaka na kati ya Yawu, kasi Moise sonikaka Misiku. Mpe Nge pesaka yandi muswa ya mukanda, ya kusonika na bawu mukanda ya kufwa makwela, samu na ntima ngolo ya bawu.

³¹⁷ Paul Santu ya nene, yina vwandaka musoniki ya Ngwisani ya Malu-malu, yandi mpe siamisaka yawu, ti, “Mu ke na kuzonza landila mitindu yayi; munu, kasi Mfumu ve.”

³¹⁸ Mutindu mosi ya kele bubu yayi, Mfumu Nzambi, na nsuka ya yinza, na yina beto kele awa na yisi ya kyadi ya Nzambi, na kuzabaka ti ntama mingi ve beto ke pesa mvutu na Ntwala ya Yandi. Mpe ti Nge me sala bima mingi, Mfumu, mu ke kwikila, na ntwala ya meso ya bantu yayi, ti bawu ke kangama na Yayi mutindu ti Yawu me katuka na Nge. Mpe samu na kupesa kimbangi awa bubu yayi, ya bantu mingi ya kuvwanda awa yina kumonaka kwandi Kidimbu yango na zulu ya mongo, kisika Bawanzio ya Mfumu kwizaka na mupepe ya ngolo, kisika ya kwizaka Bawanzio sambwadi, kisika kumonana ya Mansweki Sambwadi kufungukaka; mpe Wanzio mosi yina, na lweka mosi, na zulu ya mongo mosi, kilumbu yina Yayi kumonisamaka pwelele!

³¹⁹ Nzambi, mu ke sambila ti bantu ke kwenda na bayinzo na kutondaka ti Nzambi me pesa bawu lemvo yayi. Mu me zonza kaka Yawu, Mfumu, na nzila ya muswa. Mpe mu me tuba Yawu na nzila ya muswa, Mfumu. Mpe ti bantu kuvwanda na lutondo mingi ti bawu ke meka dyaka ve na kusala disumu yina! Mpe ti bawu meka ve na kusala disumu mosi, kasi kuzola Nge na bantima ya bawu nyonso. Mfumu, pesa mayangi na makanda yayi, mpe ti bawu kukula mpe kuyindula bana ya bawu na kulongaka bawu landila Nzambi.

³²⁰ Samu ti, Nsangu ya munu yina vwandaka na ntima ya munu me pesama, Mfumu. Mu me sala nyonso mutindu mu zaba kusala. Mpe Satana me nwanisa munu balumingu, mpe

bangunga kukondwa kulala. Kasi ntangu yayi mu me tuma Yawu, Mfumu, na bantu yayi, ti bawu ke longuka Yawu, mpe ke kwenda mpe ke zinga samu na Nge. Pesa yawu, Mfumu. Ya me katuka mapeka ya munu ntangu yayi. Bawu keke na maboko ya Nge. Mu ke sambila ti Nge ke sakumuna bawu.

³²¹ Sakumuna bamuswale yayi, Mfumu, yina keke na zulu awa, samu na bantu ya kubela mpe bantu ya mpasi. Ti nkokila yayi vwanda mosi ya bankokila ya kulutila nene, ya ngolo mingi, ti bantu nyonso ke beluka. Pesa yawu, Mfumu. Sakumuna beto kintwadi.

³²² Ti beto kwenda na ngemba, na kyese, na mayangi, samu ti Nzambi ya ngidikulu me lakisa beto “kubanda mbandukulu,” mpe me pesa beto, na kati ya muvusu ya beto yina beto keke na kati, lemvo ya Yandi dyaka, na bilumbu ya nsuka yayi. O Nzambi ya Nene mpe ya Seko, mutindu beto ke tonda Nge samu na yawu! Mpe ti bantima ya beto na kyese mingi, ti beto ke kuzwa ata mbala mosi ve luzolo yankaka na kusumuka na ntwala ya Nge. Na Nkumbu ya Yesu. Amen.

Mu zola Yandi, (Samu na yinki beno lenda zola
Yandi ve?) Mu zola Yandi
Samu Yandi zolaka munu ntete
Mpe futaka mpulusu ya munu
Na Calvaire. . .

³²³ Mu ke tuba yawu ntangu yayi samu milongi kuzaba. Yayi keke kaka samu na bawu bayina ke landaka Nsangu yayi!

³²⁴ Oh, beno keke na kyese? [Dibuundu me tuba, “Amen.”—Mu.] Mu me tuba na beno Tsyelika, MUTINDU ME TUBA MFUMU, nzila nyonso! [“Amen!”]

³²⁵ Ntangu yayi beto telama mpe beto telemisa maboko ya beto, na yina beto ke yimba yawu dyaka, “Mu zola Yandi.” Mu zola Yandi samu na lemvo ya Yandi. Mu zola Yandi samu na kyadi ya Yandi. Mu zola Yandi samu na Ndinga ya Yandi. “Mpe Ndinga ya Mfumu ke kwizaka na bapofete!”

Mu . . .

³²⁶ Kwiza, mpangi-bakala. Kwenda na ntwala.



MAKWELA MPE KUFWA MAKWELA KING65-0221M
(Marriage And Divorce)

Nsangu yayi ya Mpangi William Marrion Branham, kulongamaka na Kingelesi, na Lumingu na suka, na kilumbu ya 21 ya Ngonda ya zole, na mvula 1965, na Ecole Secondaire Parkview na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisdilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org